

Meje Po Carte Po Carta Nacom Pia Jiton Tatsi Tatina, Hebreomonae Tatinatsi

*Meje yabara xua Nacom Pexanto itoroba jiwitha petacue-
icueijeinexatsi*

¹ Caena bayatha Nacom itoroba pia peitorobi jume diwesi petacueicueijeji jiwichi. Barapomonae Nacom tacueicueijeichi xua poxonaе tsipaebatsi wamo susato jiwi. Barapomonae matowa tacueicueijeji tsaibi xua Nacom tacueicueijeji tsaibichi matautano ainya coyeneintha tsipaeba xua Nacom tatsipaebatsi. ² Ichitha nama anoxuae matapainya barapo matakabinthe po matakabin opi dubena Nacom itorobica Pexanto wanacata cueicueijeinexa, yawa wayabara yaputaenexa Nacom. Barapon Nacom Pexantoxae tatsi caena bayatha barapo nacueforota. Matautano Nacom Pexanto caena barapoxonaе cana exana xua Pexanto tatsi pecanamataxeinaenexa daxita coyeneintha. ³ Nacom Pexanto tatsi pexeinya peitupanae juntũ coyenein xeina po juntũ coyenein Nacom xeina. Bapon Nacom Pexanto cui coyene jon-tatsi. Matautano bapon Nacom Pexanto tatsi pia pejume ayapusũ itorobiwatha babatiya exana daxita carepaya nacuan. Nacom Pexanto tatsi nacui yabara jume weta xua Nacom Pexanto peyabara paebixae pejume diwesi-sitha. Baxua exana poxonaе naca tsitupa xua wanaca juntũ coyene xanepana exanaenexa. Bapon naca capanepa abe waexanae cuiru coyenein weya. Bapoxonaе bapon itaboco beicha pona penacuaretsinexa pexeinya peecaethopeibiwatha Nacom pia coxa weya tatsi xua

itaboco beicha xua Nacom pia peecaethopeibiwatha tatsi beicha.

Meje yabara xua Nacom Pexanto tatsi peainya cuin beyacaincha matatsunpiwi

⁴ Nacom Pexanto ainya cui cana exana beyacaincha matatsunpiwi. Nacom baxua tsita itapeinya xeina xua poxonae wun duta Pexanto xua po wun jei: “Nacom Pexanto”, jei, po wun bichocono ainya cui beyacaincha matatsunpiwi pewun. ⁵ Tsipei Nacom bapana jopa jeiyo matatsunpintha:

“Xam Taxantom, anoxuae jivi tsita itapeinya xeinan xua xan jinya axan”,

jopa bapana jei Nacom matatsunpintha.

Matautano bapana jopa jei matatsunpin yabara:

“Xan bapon pia paxa tatsin tsane,

bapon bara taxanto tsane”, jopa

bapana jei Nacom xua matatsunpin

peyabara paebiwatsi.

Saya ba meisa Nacom Pexantotha

yabara paeba barapo jume.

⁶ Matautano poxonae Pexanto itorobica po cae pin nacuamonaepiwitha tsique, pon yatsicaya compa tatsi, Pexanto yabara jei:

“Barabun daxita tamatatsunpiwimonae

Taxanto wuna jaintinchi”, jei Nacom.

⁷ Nacom yabara jei matatsunpiwi:

“Tamatatsunpiwi itoroban xua nainya inta

nacuita icha joibo ichi xua nainya pona

poxonae itoroban barapo joibo.

Barichi barapomonae itoroban xua inta

daunweya nacuita icha nawa coicha ichi xua

daunweya taxua poxonae itoroban barapo nawa”,

jei Nacom.

⁸ Ichitha nama Nacom Pexantotha jei:
 “Jaina, xam ponxaem Nacom, ataya tsitecaeya
 itorobiya ewatsiname xua
 itorobathopequeibame jiwi.

Jinya neitorobiya ewatsi coyenewa
 bara ataya pexainyei coyenewa.

⁹ Xam ichichipame pocotsiwa exana
 pomonae xanepanaya peexanaewi.
 Matautano bichocono aitafaetabim
 pocotsiwa exana pomonae abe peexaneibiwi.
 Daxota xan Nacom ponxaein, jinya Nacom
 bichocono cajuntũ coyene weiweina
 exanatsi, beyacaincha xua jinya jiwimonae
 juntũ coyene weiweina exanan”,
 jei Nacom Pexantotha.

¹⁰ Equeicha Nacom Pexantotha jei:
 “Xam pon pepa Necanamataxeinaem jiwi,
 caena bayatha forotame barapo cae
 pin nacua poxonae aena.
 Jinya coya exaname peitaboco.

¹¹ Daxita baxuan pocotsiwan xua jinya
 neexanaewam weraweracaena.
 Tsipei daxita baxuan saya peruwan tsane,
 icha be poxonae paparuwa ichi xua
 peruwa tsane xua tsapatsapaca.
 Ichitha xam nama ataya
 tsitecaeya poponaename.

¹² Barapo cae pin nacua irũ barapo itaboco
 poxoru peruwa tsane pichiname xua
 nexubinexa, xua pena ira equeicha
 neexanaenexa yawa xua itaboco.
 Barapocotsi juta coyeneya exanaename
 icha be poxonae pebin ichi xua peruwa
 nama xuena xua xuba, xua
 penawa penamaxatatsinexa.

Ichitha xam nama ataya tsitecaeya poponame.
Matautano jinya nepoponae coyenewa
ataya jopa weraweracae tsane”,
jei Nacom Pexantotha.

¹³ Nacom bapana jopa jeiyo matatsunpintha:
“Xam tacoxa weya ecare, beya poxonae abu
caexanaeinchi xua itorobiname jinya
necaaitafaetabi jiwi”, bapana jopa jeiyo
Nacom matatsunpintha.

Saya meisa Pexantotha baxua paeba.

¹⁴ Daxita matatsunpiwi peinya pejinompaewi jiwitha.
Barapo matatsunpiwi exana dubenanaebiya pocotsiwa
Nacom itoroba. Nacom itoroba barapomonae xua
petayawenaenexa tsainchi pomonaetha pomonae bexa
Nacom capanenebiyaena pomonae pejume cowantsi ji-
wixaetsi.

2

*Meje yabara xua poxonae naca muxuweta xua jopa bewa
pewawi cana exanaetsi Nacom pia pecapanenebiyae coyenewa
tatsi*

¹ Nacom Pexanto ainya cui cana exana beyacaincha
matatsunpiwi. Daxota bewa matowa itapeta jume naitae-
watichi pocotsiwa bapon yabara xua jume tainchi. Bapox-
onae jopa wayabara junte mainaponae tsainchi po coyene
xua Nacom pia pecapanenebiyae coyenewa tatsi. ² Po
peitorobi coyenein caena bayatha matatsunpiwi Nacom
tacueicueijeichi, barapo coyenein bara xainyei. Pomonae
jopa jume cowantsiyo barapo peitorobi coyenein xuano
xua abe exanaponano, barapomonae atene exanaeinchi
xua canacui matajupiya cana exanatsi. ³ Cristo naca cana
exana xua panenebiyatsi abe waexanae cuiru coyenein
weya. Cristo pia pecapanenebiyae coyenewa bichocono
ainya cui coyenewa. Icha Cristo pia pecapanenebiyae

coyenewa cayabara nanta xeinatsi xua pepawi xua jopa ainya cuiyiyo, waxainchi bapana jopa naca capanenebiyae tsane xua poxonaе jiwi atene exanaeinchi abe peexanaexae. Barapon Cristo pon jiwi Pecanamataxeinaein barapo pecapanenebiyae coyenewa yabara tsi-paeba copiya. Bapoxonaе xuya barapo pecapanenebiyae coyenewa naca tsipaeba pomonaе jume tane pocotsiwa xua bapon paeba pon jiwi Pecanamataxeinaein. ⁴ Nacom tsita itapeinya xeina xua barapomonaе bara xaniwaicha yabara paeba Nacom pia pecapanenebiyae coyenewa. Baxua exana poxonaе Nacom cana exana xua barapomonaе pexeinya petsita itubi coyenewan muxuna exana poxonaе cueicueijeі. Matautano baxua exana poxonaе cana exana xua barapomonaе muxuna exana pocotsiwa bichocono wunaе xua jiwi nabenaeca cana exanatsi. Matautano baxua exana poxonaе cana exana xua barapomonaе pexeinya peayapusu itorobi coyenewan muxuna cueicueijeі. Matautano Nacom tsita itapeinya xeina xua bara barapomonaе xaniwaicha cueicueijeі poxonaе Nacom pia Pejumope tunaxu tatsi itoroba barapomonaе pia juntu coyeneintha tatsi xua pecatsibinexa po cui coyeneya peexanaenexa daxita barompaya tsiniya. Baxua exana barapo Nacom pia Pejumope tunaxu tatsi icha be pocotsi coyenewa Nacom ichichipa xua barapomonaе barapo cui coyeneya exanaena.

Meje yabara xua Jesucristo be jiton coyeneya naexana

⁵ Nacom jopa copatsi tsane xua matatsunpiwi canamataxeinaena barapo pena nacuatha po nacia yabara xuaunxuae pacata tinatsi. ⁶ Jame nama Nacom Pejume Diwesitha ichun yabara jeye xua pomonaе barapo pena nacia pecanamataxeinaewa tsane, jeye:
 “Nacom xam jiwi toxecha bichocono pin juntu coyene xeiname.

¿Eta xua metha yabara nanta xeiname
jiwi xua ainya cui exaname xua

pecanamataxeinaenexa tsane ichamonaе?

⁷ Nacom copiya saya caetotha exaname xua
jiwi be conotha ainya cui.

Baxua exaname poxonaе matatsunpiwi toxeinchiya
ainya cui exaname beyacaincha jiwi.

Ichitha cotacaya exaname xua jiwi
ainya cui naexana.

Jiwi cana exaname xua pexeinya
peitupanae coicha xeina

yawa catame barapomonaе peayapusu
itorobi coyenewa xua icha jiwi

pecanamataxeinaewa tsainchi.

⁸ Po jiwi cajume cowunta barapo

jiwitha catame peayapusu itorobi

coyenewa daxita xua pecanamataxeinaenexa

xuantha xua forotame”,

jei xua ichun tsipaeba Nacomtha.

Poxonaе Nacom cana exana jiwi xua canamataxeinaena

daxita xua xuan forota, dapocotsi coyenewa aibi xua

jiwi jopa itacupaetsi xua pecanamataxeinaewa. Daichitha

awiya cataunxuae jopa jiwi cui taetsi xua daxita pecana-

mataxeinaewa. ⁹ Ichitha waxainchi Jesús yaputainchi

pontha pon Nacom saya caetotha cana exana xua jopa

ainya cuiyo. Matatsunpiwi conotha ainya cui beyacain-

cha xua Jesús xua poxonaе caetotha cana exanatsi xua

jopa ainya cuiyo xua poxonaе popona be jiton. Nacom

bichocono peantobexae daxita jiwi daxota bapon copata

xua Cristo tsitupaena daxita jiwi abe pia peexanaexae.

Anoxuae equeicha Nacom ainya cui cana exana xua Jesús

ainya cui cana exanatsi. Matautano Nacom cana exana

xua Jesús jopa juniya ainya cuiyiyo xua jiwi itorobiya

peewatsiwatsi. Matautano Nacom Jesús catatsi pexeinya

peitupanae coicha. Nacom baxua exana xua Jesús pia petsitupaexae jiwi.

¹⁰ Nacom forota daxita coyenein. Matautano daxita baxuan Nacom nata exana. Matautano Nacom ichichipa xua daxita piamonae tatsi pexeinaewa tsane pia pex-einya peitupanae coicha tatsi peponaenexa tsane pia nacuatheicha tatsi. Daxota Nacom tsita xanepanatsi xua poxonae Jesucristo atene exanatsi beta yatsicaewa pejuntũ coyene wunaetsinexatsi xua jiwi pecanamataxeinaenexatsi Nacom pia nacuatheicha. Baxua Nacom exana poxonae Jesucristo atene exanatsi poxonae tsitupa xua jiwi pecapanenebiyaenexatsi abe pia peexanae cuiru coyenein weya tatsi. ¹¹ Tsipei daxita pomonae jũntũ coyene xanepana exanatsi Nacomtha, irũrũ Jesús pon cana exana baxua barapomonaetha, daxita barapomonaenantaũta caein Paxa pon Nacom. Daxota Nacom Pexanto tatsi jopa auriyo poxonae naca yabara jei: “Tayapin jiwi pam”, poxonae jei. ¹² Nacom Pexanto tatsi pon Jesucristo, caena bayatha Nacom Pejume Diwesitha xua salmos penaxũnae weixi diwesintha jeye Nacomtha:

“Cayabara paebinchi tayapinmonae jiwitha.

Cata naxũnaeinchi pewei xua wũnae

tacajainchinexa poxonae nanabarũ

nanacaetutsin jinya botha pomonae cajume

cowũnta”, jei Jesucristo Nacomtha.

¹³ Ichacuitha caena bayatha Jesucristo jeye xua Isaías pia diborotha:

“Xan jume cowũntsiya wũnae ewatsin

Nacom xua tana neyawenaewa”, jei.

Equeicha Jesucristo jeye:

“Xote ecan, barũ ecan tapexui pomonae tana

nejume cowũntsiwi pomonae Nacom

necata”, jei Jesucristo.

¹⁴ Pexui ba bara xeina pejana yawa pewito icha be coxiyeiwi ichi tsipei jiwixae. Barichi Jesús xeina jiton pia pepon tatsi pexeinaexae jiwi pia pewito tatsi xuano xua jiwi pia pejana tatsi. Jesús baxua xeina xua pet-situpaenexa jiwi. Daxota itacupatsi xua peamanayabiwa pontha pon xua peayapusu itorobi coyenewa xeina xua jiwi pejutebiwatsi. Bapon apara pon caurimonae pia pentacaponaein tatsi. ¹⁵ Jesús baxua nacata exana wanaca capanenebiyaenexa wajunuwi coyene weya xua poxonae yabara junuwatsi xua wawerapaewa tsane. Jiwi daxita matakabin junuwiya jinompeiba xua pewerapae-wayainwa. ¹⁶ Bara xaniyei Jesús jopa tsipatopeicaeyo xua peyawenaenexa tsane matatsunpiwi. Apra jame Jesús tsipatopeica peyawenaenexa tsane Abraham pia pemomoxi susato jiwi tatsi xua yatsicaewa jiwi. ¹⁷ Daxota Jesús poxonae naexana bewa yawa naexanaena daxita coyeneya icha jiwi pia pepon tatsi ichi. Bapon bewa baxua yawa naexanaena pia penaexanaenexa pepa wasacerdotepin pocotsin nacata paebeiba Nacom beicha. Matautano bapon Jesús pon pepa wasacerdotepin xainyeya taexana po coyene xua ba sacerdotemonae pia petaexanae coyenewa xua Nacom tsita exanatsi. Bapon Jesús naca weyatane xua wanaca yawenaenexa, xua jiwi pet-situpaenexatsi xua Nacom jiwi pejuntú coyene yabara juntemainaenexa tsaibi tsainchi abe pia peexanae cuiru coyenein tatsi. ¹⁸ Jesús atene exanatsi poxonae caurimonae pia pentacaponaein tatsi juntu coyene jujutatsi petaenexa tsainchi icha abe exana. Daxota anoxuae bapon Jesús itacupatsi xua peyawenaewa pomonaetha pomonae iruru juntu coyene jujutatsi caurimonae xua abe peexanaewa tsane.

3

Meje yabara xua Jesús peainya cuin beyacaincha Moisés

¹ Nacom iru paca wun duba poxonaе itapeta pomonaе pepatsinexa tsane pia nacuatheicha tatsi. Tamonaе pam, paxam jiwana pam pomonaе pejume cowuntsiwi Jesu-cristo, pomonaе pam Nacom paca juntu coyene xanepana exana xua piamonaе tatsi painya paca cana exanaenexa. Daxota Cristo Jesús pacayabara nanta xeinare. Bapon Jesús Nacom pia peitorobin tatsi pon naca tsipaeba Nacom nexa. Matautano bapon wapepa sacerdotepin pon wanacata paebeibin Nacom beicha. Bapon payabara cueicueijan ichamonaetha wajume cowuntsixae bapon.

² Jesús bara xainyeya exana Nacom pia petanacuichiwa tatsi Nacom peyabara tsiwunaе muxu dutsixae bapon barapo penacuichiwana xua Nacom pia peitorobin tatsi tsane yawa wapepa sacerdotepin tsane. Jesús beta xainyeya taexana, icha matha Moisés ichi xua poxonaе daxita coyene beta xainyeya taexana Nacom piamonaetha xua Nacom nexa.

³ Jesús pecapanepaexae jiwi bewa bichocono toxecha baru cui itara jinaetsi bapon beyacaincha xua baru cui itara jinatsi Moisés. Barapocotsi juta coyeneya ichi, bewa Jesús cana exanaetsi icha be poxonaе jiton ichi xua bewa baru cui itura jinaeinchi xua ainya cui exanatsi peacabixae bo beyacaincha xua bo xua ainya cui tsuncuae.

⁴ Daxita ba bon tsoponaе poxoru apara jiton peexanaexae. Ichitha jame pon yatsicaewa nama daxita coyenewan exana apara bapon Nacom.

⁵ Bayatha Moisés apara pon petanacuichinchi Nacom. Bapon xainyeya daxita exana Nacom pia botha pocotsiwa Nacom itoroba. Bapon Moisés pia penacuichiwa tatsi saya xua yabara tsiwunaе caunuta pocotsiwan xua bexa Nacom exanaena.

⁶ Ichitha nama Cristo Nacom Pexantoxae tatsi xainyeya daxita exana Nacom nexa tsipei cana exana xua bapon canamataxeina daxita pomonaе Nacom piamonaе tatsi. Waxainchi Nacom piamonaetsi icha ajuntuyapusuya jume

cowuntapoinchi Cristo beya xua poxonae tɔpaeinchi. Matautano waxainchi Nacom piamonaetsi icha jɔntɔ coyene weiweinaya wɔnae ewatatsi pocotsiwa bexa Nacom wanaca tsixanaewa tsane.

Meje yabara xua nafifina caewata Nacom piamonaetsi tatsi

⁷ Cristo ainya cui peexanaexaetsi beyacaincha xua Moisés ainya cui exanatsi daxota Nacom pia Pejumope tɔnaxɔ tatsi naca itoroba xua bewa jume taetsi Cristo. Baxua paeba Nacom pia Pejumope tɔnaxɔ tatsi. Nacom Pejume Diwesitha, jeye:

“Anoxuae pana nejume taema pocotsiwa paca tsipaebatsi ponxaein Nacomxaein.

⁸ Painya xoba pana nejumefebame painya jɔntɔ coyenewatha xua daxota jopa painya tana nejume cowuntsiwam.

Jopa bara paichinde icha pomonaetsi ichi xua poxonaetsi bayatha nejume matawenta xua exanan poxonaetsi jinompa ichaxota ira xuepana susato tsurucuae nacuatha. Barapomonaetsi nefayacoteiba poxonaetsi nejɔntɔ coyene jɔjɔteiba beya poxonaetsi anaepanan barapomonaetsi poxonaetsi jopa xapain exaneibiyo.

⁹ Barapomonaetsi pomonaetsi nejɔntɔ coyene jɔjɔta, apara painya amo susato jiji. Barapomonaetsi baxua inta exana poxonaetsi jopa nejume cowuntsiyo.

Baxua exaneiba beya poxonaetsi cuarenta po weibe tsuxubi bequein taiba pocotsiwa xua taexaneiban barapomonaetsi xua beya cuarenta po weibetha.

¹⁰ Daxota barapomonaetsi caseban yawa yabara jan barapomonaetsi: ‘Barapomonaetsi jopa benejume

cowuntsiyo pejuntũ coyeneintha yawa
jopa beyaputaeyo pocotsiwa ichichipan
taexanan barapomonae', jan.

¹¹ Barapomonae caseban.

Tacoutha jume daunweya najan:

'Barapomonae bapana jopa patsi tsane
tanacuatha ichaxota po nacuatheicha
nafifinacaewatsina pomonae tana nejume
cowuntsiwi', najan", jei Nacom
pia Pejumope tũnaxũ tatsi,
Nacom Pejume Diwesitha.

¹² Tamonae pam, pomonae irũ painya nejume cowuntsi
jiwixae Jesucristo. Painya xoba paxeiname po jũntũ
coyene bichocono abe, po jũntũ coyene jopa ichipaeyo
xua pejume cowuntsiwa Nacom, pon xua asũ popona.

¹³ Jame maisa daxita matabin nantiya pana najũntũ
coyene tsacabare xua ajũntũyapusũya painya nejinom-
paewa tsane. Daxita pam baxua paexande anox-
uae poxona cataunxuae po dapaetha anoxuae petain
paca itacũpa xua paexaname baxua. Mataũtano baxua
paexande xua jopa pata tana nejumefebiwam painya
jũntũ coyenewatha. Icha pana nejumefebame painya
coutha pana namuxujainyabichipame xua daxota abe
painya neexanaewa tsane. ¹⁴ Bewa xanepanaya aya-
pusũya jume cowũnta dubenanaebiyaeinchi Nacom xua
beya poxonae tũpaeinchi. Icha baxua betiya ayapusũya
jume cowũnta dubenanaebiyaeinchi icha ichichi pox-
ona aena jume cowũntatsi, bapoxona nayawa muxuna
xeinaeinchi Nacom pia nacuatheicha pocotsiwa Cristo
xeina.

¹⁵ Daxota equeicha paca tsipaebatsi xuaunxuae po di-
wesi paca tsipaebatsi xua Nacom Pia Pejumope tũnaxũ
tatsi cueicuei jei, jeye:

"Anoxuae pana nejume taema pocotsiwa paca

tsipaebatsi, ponxaein Nacomxaein.
 Icha pana nejume taneme bapoxonae painya xoba
 pana nejumefebame painya juntu coyenewatha
 xua daxota jopa pata tana nejume
 cowuntsiwam tsane.

Jopa bara paichinde icha pomonae ichi xua
 poxonae nejume matawenta poxonae jinompa
 ichaxota ira xuepana susato tsurucuae nacuatha”,
 jei Nacom pia Pejumope tñaxu tatsi.

¹⁶ Payabara nanta xeinare pomonae jume tane xua Na-
 com pejume tatsi xua bapoxonae Nacom jume matawen-
 tatsi. Daxita bapomonae apara pomonae Moisés mata
 cawarapa Egipto nacua weya. ¹⁷ Payabara nanta xeinare
 Nacom xua caseba xua beya cuarenta po weibetha tsux-
 ubi. Bapomonae apara israelmonae pomonae xua abe
 exana poxonae jinompa ichaxota ira xuepana susato
 tsurucuae nacua beya, xuano xua baxota werapano.
¹⁸ Payabara nanta xeinare pomonae Nacom daunweya
 yabara paeba, xua jei: “Barapomonae bapana jopa
 patsi tsane tanacuatha ichaxota po nacuatheicha nafi-
 finacaewatsina pomonae tana nejume cowuntsiwi”, jei.
 Bapomonae apara israelmonae pomonae xua jopa ex-
 anaeyo pocotsiwa Nacom itoroba. ¹⁹ Bara yaputainchi xua
 barapomonae jopa itacupaetsi xua pepatsiwa Nacom pia
 nacuatheicha tsipei jopa Nacom jume cowuntsichi.

4

¹ Waxainchi yabara jume cowunta dubenanaebiyatsi
 xua Nacom naca tsiwuna nae muxu duta. Nacom naca
 tsiwuna nae muxu duta xua bara wanaca itacupaewa tsane
 xua wapatsiwa pia nacuatheicha po nacua xua Nacom
 pia penafinacaewatsi nacua. Daxota poxonae cataunx-
 uae naca itacupa xua wapatsiwa tsane barapo nacuatha

bewa yabara najuntũ coyene exabichi xua paxam jiwana jopa itacupaetsipaetsi xua pepatopaewa Nacom pia nacuatha. ² Waxainchi barichichi jume tainchi barapo Nacom pia pecapanenebiyae diwesi, icha bayatha barapomonaе ichi xua jume tane barapo diwesi. Ichitha barapo diwesi jopa yawenaetsi barapomonaе xua pejume cowantsinexa Nacom, tsipei jopa jume cowantsiyo barapo diwesi. ³ Waxainchi nama barapomonaetsi xua wajume cowantsiwi barapo pecapanenebiyae diwesi. Daxota naca itacupa xua wapatsiwa Nacom pia nacuatheicha ichaxota bapon naca barũ nafifinacaewatsina baxoteicha. Nacom wamo susato jiwi yabara paebatsi xuaunxuae paca tsipaebatsi. Jeye:

“Barapomonaе caseban.

Tacoutha jume daunweya najan:

‘Barapomonaе bapana jopa patsi tsane tanacuatha ichaxota po nacuatheicha nafifinacaewatsina pomonaе tana nejume cowantsiwi’, najan”,
jei Nacom Pia Pejumope tunaxũ tatsi.

Bequein baxua Nacom paeba ichitha caena bayatha weta barapo nacua ichaxota jiwi nafifinacaewatsina poxonaе nacobe weta xua daxita forota barapo cae pin nacuathe.

⁴ Po matacabi pewun “siete matacabi”, jei, barapo matacabi Nacom Pejume Diwesitha yabara paeba. Bapon jeye: “Nacom nacuita seis po matacabibe.

Bapoxonaе nafifinacaeca po mataqueitha pewun ‘siete matacabi’, jei”,
jei Nacom Pejume Diwesitha.

⁵ Equeicha Nacom Pejume Diwesitha jeye:

“Barapomonaе bapana jopa patsi tsane tanacuatha ichaxota po nacuatheicha nafifinacaewatsina pomonaе tana nejume cowantsiwi”, jei Nacom.

⁶ Ichitha cataunxuae acoibi ichamonae pomonae xua bexa tsane Nacom copatsina xua nafifinacaewatsina ichaxota bapon nafifinacaewata. Barapomonae jume cowuntsina xua Nacom paeba. Pomonae copiya bequein jume taetha Nacom pia pecapanenebiyae jume barapomonae Nacom caena bayatha jopa copatsiyo xua barapomonae nafifinacaewata tsipei jopa jume cowuntsiyo pocotsiwa Nacom paeba. ⁷ Daxota Nacom nanta xeina xua equeicha pena matabi exana. Barapo matabi xua wɛn duta “anoxuae” jei xua pena coyene. Barapo matabitha xua piamonae tatsi petaitacupaewatsi tsainchi xua nafifinacaewatsina. Baxua Nacom exana caena bayatha poxonae David popona xua ainya wei pirapae poxonae jinompa pomonae jopa copatsichi xua nafifinacaewata. Anoxuae Nacom bapocotsiwa naca tsipaeba pocotsiwa bayatha tsipaeba piamonae jiwitha, poxonae David popona, pon jeye:

“Icha anoxuae pajume naitawatame pocotsiwa Nacom paca tsipaeba jopa pajumefebinde painya jɛntɛ coyenewatha xua daxota jopa Nacom painya nejume cowuntsiwam”, jei David caena bayatha Nacom nexa.

⁸ Josué caena bayatha wamo susato jiwu matabapoinchi Canaán nacua berena pomonae Israel piamonaexae tatsi. Aparu jopa matabaponaeyo ichaxota po nacua Nacom yabara paeba xua barapomonae nafifinacaewatsina. Icha Josué bayatha matabaponaetsipa barapomonae barapo nacua bapoxonae Nacom jopa nantawenonaetsipae xua exanaena icha matabi po matabitha poxonae barapomonae itacupatsi xua pepatsiwa tsane barapo nacua, po nacua ichaxota Nacom yabara paeba.

⁹ Daxota cataunxuae awiya barapo matabi tsoxonae po

matacabitha poxonae Nacom piamonae tatsi nafifinacae-watsina Nacom pia nacuatheicha. ¹⁰ Tsipei pon weta pia penacuichiwa pocotsiwa Nacom itoroba bara itacupatsi xua nafifinacae-wata ichaxota Nacom nafifinacae-wata. Bapon baxua exanaena icha Nacom ichi poxonae nafifinacaeca, poxonae nacobe weta pia penacuichiwa xua poxonae forota daxitan. ¹¹ Daxota bewa ajuntusuya jume cowanta dubenanaebiyaeinchi xua wanafifinacae-watsinexa tsane ichaxota Nacom nafifinacae-wata. Baxua exanaeinchi xua ichamonae waxainchi jiwantsi jopa peyaseicaewa tsane xua nafifinacae-wata. Waxainchi jopa ichipaetsi xua icha ichamonae ichi xua jopa nafifinacae-watsiyo jopa pejume cowantsixae pocotsiwa Nacom paeba.

¹² Nacom Pejume Diwesi peajuntuyapusu diwesi xuano peayapusu itorobi coyene xeina. Barapo Nacom Pejume Diwesi barapocotsi jata coyeneya ichi xua icha ba cusi ichi xua po wato nantiya baru ducuabe. Barapo cusi taju uncuiya pebarawa xua pepontha. Barapoxonae barapo cusi itapeinya xeina daxita pocotsiwan xeina wan iya xua matha iya dubeinya bupaniya. Ichitha Nacom Pejume Diwesi ayapusu beyacaincha cusi tsipei barapo Nacom Pejume Diwesi itacupatsi taju bereca pona wajuntu coyenewatha ichaxota nanta xeinatsi. Barapo diwesi naca yaputane exana po coyenein xua wajuntu coyenewatha xeinatsi. Naca yaputane exanano po coyenein yabara nanta xeinatsi wajuntu coyeneintha. ¹³ Dapocotsiwan aibi barapo cae pin nacuathe xua Nacom forota pocotsiwan xua xuan nantiyatarubena Nacom peitabaratha pocotsiwan xua bapon jopa taeyo. Daxitan naitatarubena xuano xua Nacom itacupatsi xua beta petaewa daxita coyenein. Nacomtha bexa yabara tsipaebinchi xua pocotsiwan bayatha exainchi.

Meje yabara xua Jesús pepa sacerdotepin

¹⁴ Jesús apara Nacom Pexanto tatsi. Bapon wasacerdotepin, pon pepa sacerdotepin, pon bichocono yat-sicaya peainya cuin. Bapon bayatha patopa Nacom peitabaratheicha tatsi. Daxota bewa ajuntayapusya jume cowunta dubenanaebiyaetsi bapon, pon yabara cueicueijeichi ichamonaetha. ¹⁵ Barapo wasacerdotepin pon pepa sacerdotepin, naca weyatane xua wanaca yawenaenexa poxonae juntu coyene faefaenouneibatsi abe waexanaexae. Bapon baxua nacata exana, tsipei bapon barichichi juntu coyene jujutatsi xua abe peexanaenexa. Caurimonaie pia pentacaponaein tatsi juntu coyene jujuta icha naca ichi. Daichitha nama bapon Jesús bapana jopa abe exanae. ¹⁶ Daxota bewa ajuntayapusya wucaetsi Nacom pon bichocono naca antobe. Jopa bewa junuwi tsainchi xua wacueicueijeija Nacomtha. Bapoxonae Nacom naca weyataena wanaca yabara jantemainaenexa xua abe waexanae cuiru coyenein. Matautano bapon wanaca antobexae naca yawenaena poxonae po matacabitha canantawenoneibatsi, poxonae naca juntu coyene jujuta.

5

¹ Jiwi ba barompaya pia xantha tatsi jiwana taitapetatsi pomonae xua daxita cana exanatsi pepa sacerdotepiwi. Barapo sacerdotepiwi itorobatsi xua barapo sacerdotepiwi caunuta jiwi yabara poxonae cueicueijeie Nacom peitabaratha xua jiwi nexa. Matautano barapo sacerdotepiwi yabara tsiwun dubatsi po coyene jiwi petaexaneibiwa tsainchi Nacomtha pocotsiwan xua jiwi amanaya pecatsiwa Nacomtha abe peexanaexae. Matautano barapo sacerdotepiwi yabara tsiwun dubatsi po coyene xua jiwi petaexaneibiwa tsaibi tsainchi xua poxonae duwei pejutebiwa pocotsi duwein xua jiwi

amanaya pecatsiwa Nacomtha abe peexanaexae. ² Barapo sacerdotepiwi ichacuiŋa jũntũ coyene faefaenouneiba, poxonaē jũntũ coyene jũjũteibatsi caurimonae pia pentacaponaein tatsi xua abe peexanaenexa. Tsipei barapomonae nacui yaputane xua poxonaē jũntũ coyene jũjũteibatsi, daxota bara itacũpatsi xua peyawenaewa ichamonaetha. Itacũpatsi xua peyawenaewa pomonaetha pomonae abe peexanaewi xua bequein jopa yaputaeyo xua abe exana, irũrũ pomonae yatsicaewa nacui yaputane xua abe exana. ³ Barapo sacerdotepiwi irũrũ abe exaneiba xua pejũntũ coyene faefaenaexae poxonaē jũntũ coyene jũjũteibatsi caurimonae pia pentacaponaein tatsi. Daxota bewa irũrũ pia coutha nata exanaē po coyene xua duwei penata tautsinexa Nacom nexa icha poxonaē jiwĩ tacana ichichi poxonaē abe peexanaexae. ⁴ Dapon ajibi xua pia coutha naexana pon pepa sacerdotepin. Jame ba Nacom bapocotsin yabara tsiwũn duta xua penaexanaenexa pepa sacerdotepin. Mataũtano bapontha Nacom cata barapo peainya cui yabara matawũn dutsiwa icha bayatha Nacom cana ichi pon pewũn Aarõn pon copiya pepa sacerdotepin naexana. ⁵ Cristo bara cana ichichi. Bapon Cristo pia coutha jopa naexanaeyo pon pepa sacerdotepin xua peainya cui penaexanaenexa. Apra jame Nacom cata barapo peainya cui yabara matawũn dutsiwa xua pepa sacerdotepin penaexanaenexa. Bayatha Nacom yabara paeba Pexanto pejume diwesitha, barapo peainya cui yabara matawũn dutsiwa xua penaexanaenexa pepa sacerdotepin, xua jeye:

“Xam apra taxantom.

Anoxuae xan jinya axaxaein.

Yabara catsiwũn dutatsi barapo jinya

nenacuichiwanexa”, jei Nacom.

⁶ Equeicha Nacom Pejume Diwesitha xua Pexanto yabara paeba, jeye:

“Xam pon sacerdotepim, xua bara ataya tsitecaeya tsane, icha Melquisedec matha ichi pon caena bayatha popona.

Bapon pepa sacerdotepin naexana xua ataya tsitecaeya pepoponaein”,
jei Nacom.

⁷ Poxonae cataunxuae Cristo popona po cae pin nacuathe bichocono jume daunweya tsipaebeiba Nacomtha xuano jume daunweya wuqueibano beya poxonae bichocono wecoyei. Cristo wuqueiba Nacomtha, pon bequein itacu-patsi xua Cristo peyawenaewatsi xua jopa petupaewa. Mexeya poxoru bapon itapetsiya peexanaexae pocotsiwa Nacom ichichipa daxota bara Nacom jume tane pocotsiwa Cristo wuca. ⁸ Bequein Cristo Nacom Pexanto tatsi, ichitha nacuiduba xua Paxa jume jejei xua exana pocotsiwa Paxa itorobatsi xua poxonae atene exanatsi xua ichamonae exana. ⁹ Bapon pia coutha daxita najuntu cui yabara wunaeta poxonae atene xua penaexanaenexa pepa sacerdotepin. Daxota bapon Cristo exana xua jiwi capanenebiyatsi abe pia peexanae cuiru coyenein weya xua ataya tsitecaeya tsane daxita pomonae pia pejume cowuntsiwichixaetsi. ¹⁰ Nacom yabara tsiwun duta xua Cristo pepa sacerdotepin naexana, icha matha Melquisedec ichichi xua yabara tsiwun dutatsi xua pepa sacerdotepin naexana, pon caena bayatha popona.

Meje yabara xua poxonae muxuwetatsi pomonae Nacom pejume cowuntsiwi xua pebarapentsiyainwa po coyene xua pejume cowuntsiwa Nacom

¹¹ Waxainchi xeinatsi nawita xua po coyene wayabara natsipaebinexa Cristo xuaunxuae anoxuae paca tsipae-batsi. Daichitha bichocono ayapube xua paca yaputane

exainchi tsipei painya coutha jopa pana nayabara copatsim xua bara painya neyabara yaputaewa tsane baxuan. ¹² Caena bayatha bewa pana naexanaem pomonae jiwi painya necuidubi jiwi pam. Daichitha cataunxuae panantawenoname xua ichamonae equeicha caewa yabara paca cuiduba Nacom Pejume Diwesi pocotsiwan xua jiwi nantawenona copiya nacuiduba poxonae aena jume cowanta. Paxam pomonae equeicha caewa pajuntu coyene faefaename, xua painya nejume cowantsiwa. Barapo coyene icha be poxonae pexui ichi xua nantawenona mito, jopa peitacupaexaetsi xua pexaewa pewito. ¹³ Pexui poxi isainatsi ba nantawenona mito poxoru pewito jopa xaeyo. Barapocotsi juta coyeneya paichim. Paxam jopa paca itacupaeyo xua painya neyabara yaputaewa Cristo pia pecuidubiwa xua po coyene xanepanaya painya nejinompaewa. ¹⁴ Nama pewi jopa apara pexui nexiyo poxi isainatsi, jame apara ba pomonae pinyon nexa. Barapocotsi juta coyeneya ichi pomonae ba xaniwaicha jume cowanta pia juntu coyeneintha barapomonae jopa abe exanaeyo. Barapomonae nacuiduba xua yabara yaputane po coyene abe yawano po coyene wanae.

6

¹ Barabu nacui barapentatsi xua nayabara cueicueijeichi pocotsi coyenein xua copiya naca cuiduba xua Cristo yabara poxonae aena jume cowantatsi. Jame barabu nanta xeinatsi, po coyene pepa pena coyene icha pomonae pinyon ichi xua pocotsiwan nanta xaina pomonae beta jume cowanta. Po coyenein xua bayatha copiya naca cuiduba xua Cristo yabara, jopa nantawenonaetsi xua equeicha wanacuidubiwatsi po coyenein xua abe waexanaexae bewa aura tsainchi xua daxota nacui barapentatsi po coyenein abe, po coyenein xua ba naca wepu

tsana exana Nacom weya. Matautano jopa nantawenonaetsi xua jume cowuntsinchi Nacom. ² Barapocotsiwanje jopa nantawenonaetsi xua equeicha caewa nayabara cueicueijeichi tsainchi tsipei bayatha payaputaneme. Matautano jopa equeicha nantawenonaetsi xua caewa nayabara cueicueijeichi tsainchi xua bewa bautisabinchi. Matautano jopa nantawenonaetsi xua equeicha caewa nayabara cueicueijeichi tsainchi xua poxonae Nacom pejume cowuntsiwi pecobetha pemataboco jayabiwatsi xua pexeinaenexa pejuntũ cui coyenein po pejuntũ coyene Nacom pia Pejumo pe tunaxũ tatsi cata. Matautano jopa nantawenonaetsi xua equeicha caewa nayabara cueicueijeichi tsainchi xua equeicha jiwi asũ peexanaewatsi petũpae cuiru coyene weya. Barichi jopa nantawenonaetsi xua equeicha caewa nayabara cueicueijeichi tsainchi xua poxonae Nacom yabara paebina jiwi xua penatsicuentiwa xua abe peexanaexae Nacomtha. Barapoxonae Nacom itawetsina xua bara ataya tsitecaeya tsane abe peexanaexae. ³ Jame barabũ nayabara cueicueijeichi tsopona tsainchi icha coyenein xua pena coyene icha Nacom bara naca cui yabara copatsina.

⁴ Ichamona penta xua Cristo pejume cowuntsiwatsi. Daxota jopa neyapucũpaeyo xua equeicha tacuidubiwa Nacom Pejume Diwesi barapomonaetha. Barapomona Nacom pia pejume xainyeiwa nacuiduba, xuano yaputane Cristo pon Nacom itoroba po cae pin nacuathe tsique. Matautano barapomona xena po pejuntũ coyenein Nacom pia Pejumo pe tunaxũ tatsi cata. ⁵ Matautano barapomona yabara jume cui jũjũta Nacom Pejume Diwesi xua daxota yaputane xua barapo diwesi bara xanepana. Matautano barapomona tane po peyapũ itorobi coyenewa Nacom pia Pejumo pe tunaxũ tatsi cata jiwitha xua barapo jiwi barapo coyenewatha exana pexeinya petsita itũbi coyenewan beya poxonae Cristo

equeicha patopaena. ⁶ Icha daxita barapo coyenein barapomonaе equeicha nacui barapenta xua jopa Nacom pejume cowantsixaetsi, bapoxonae nama jopa itacupaetsi xua equeicha caewa pejume cowantsiwa Nacom. Poxonae Nacom equeicha pentatsi baxua be barapomonaе equeicha Jesús caewa bexotsi naetotha. Barapomonaе exana xua jiwi Nacom Pexanto tatsi yabara jume cui caponatsi tsipei jopa Nacom jume cowantsichi. Baxua icha be poxonae ichamonaе ichi poxonae matha Jesús naetotha bexotsi xua daxota daxita jiwi Jesús cui caponatsi. ⁷ Pabi ba po iratha ema m̄ jojoneca poxonae ema duneiba barapo iratha, barapo pabitha jiwi pexaewa ūba. Nacom exana barapo iratha xua pexaewa xaniwaicha taxainwaetsina xua pomonaе peubimonaе taxainwaetatsi. ⁸ Ichitha icha icha pabi saya ū pesoiwan xuwa, barapo pabi jopa wunaeyo poxoru jiwi jopa yawenaetsi poxonae ūba barapo pabitha. Daxota Nacom exana xua barapo pabi jiwi tautsina xua pesoiwan daxita tupa peexanaenexa. Icha Nacom cana ichi pabintha bara j̄ta cana ichiya exana jiwitha. Icha jiwi Nacom jume cowanta dubenanaebiya, bara Nacom beta exanaena barapo jiwi. Ichitha icha barapo jiwi Nacom pentatsi, Nacom jopa yawenaе tsane barapo jiwi. Saya jame Nacom itoroba xua barapo jiwi petautsiwa tsainchi po isototha xua bapana jopa itacounayiyo.

Meje yabara xua wawunaе ewatsiwa xua pocotsiwa Nacom yabara wanaca tsiwunaе muxu dutsiwa

⁹ Tamonaе pam, paxam pomonaе tapaca caantobe jiwichi pam. Bequein baxuan yabara paca tsipaebatsi, xua jiwi petautsiwatsi ichitha paca yabara yaputainchi xua jopa papentsim Nacom. Yaputan xua bara beta paexaname Nacom painya nepaca capanenebiyaexae. ¹⁰ Tsipei Nacom bara xainyeya exana. Nacom jopa paca yabara

juntemainae tsane pocotsiwan xua bayatha paexaname. Matautano jopa paca yabara juntemainae tsane xua ichamonaе painya neyawenaewa pomonaе iru pejume cowuntsiwi Nacom. Baxua patsita itapeinya xeiname xua painya neantobexae Nacom. Baxuan caena bayatha paexanaponaе, awiya cataunxuae baxuan paexanaponaе. ¹¹ Bequein baxua paexaname daichitha paichichipan xua daxita paxam awiya payawenaponaе name ichamonaе. Ajuntuyarusuya pawnae ewataponare pocotsiwa Nacom yabara paca tsiwnae muxu duta xua beya payacuiya werapaeya othopaename. ¹² Jopa paichichipaeinyo xua payabara ajuntucoyenefaetabim xua pawnae ewatame baxua tsipei jopa pana nayabara copatsim xua painya neyabara yaputaewa tsane baxua. Jame maisa bara jutiya paichiponaе inde, icha ichamonaе ichi xua poxonaе bichocono jume cowanta Nacom. Matautano barapomonaе jopa bepijawa aitaconaeyo xua wnae ewata pocotsiwa Nacom yabara tsiwnae muxu duta.

¹³ Poxonaе Nacom yabara tsiwnae muxu duta Abrahamtha, Nacom pia wantha yabara tsiwnae muxu duta Abrahamtha. Baxua Nacom pia wantha paeba tsipei dapon aibi pon bichocono ainya cui xua beyacaincha Nacom. Nacom ataya jume xainyei paeba daxota Nacom jopa icha wantha paebiyo. ¹⁴ Nacom jeye Abrahamtha: “Bara xaniwaicha bichocono cayawenaе inchi. Jinya nemomoxi jiwi pia pemomoxi susato jiwi tatsi pinmonaе exanaein”, jei Nacom. ¹⁵ Abraham abu saya beitatemaya wnae ewatapona pocotsiwa Nacom yabara tsiwnae muxu duta, jopa aitaconaeyo. Bapoxonaе pirapae Abraham catatsi pocotsiwa Nacom bayatha yabara tsiwnae muxu duta bapontha. ¹⁶ Poxonaе jiwi ba yabara natsiwnae muxu duta xua pocotsiwa bepa pinaе exaneibina, pewantha paeba, po wun xua ichun pewun tatsi pon xua bichocono

ainya cui beyacaincha xua barapomonaе. Barapomonaе baxua exana xua ichamonaе peyaputaenexa xua bara xaniwaicha xainyeya peexaneibinexa pocotsiwa xua pe-nayabara tsiw̄nae muxu dubeibixae. Bapoxonaе icha-monaе jopa itac̄paetsi xua baxua yabara jume mat-sontsonoba barapomonaetha. ¹⁷ Nacom ichichipa xua tsita itapeinya xeina piamonaetha, pomonaetha pomonaе pecatsixae tsane pia petsiw̄nae muxu dutsiwa xua jopa equeicha ichawa nanta xeinae tsane xua pocotsiwa ex-anaena. Nacom ichichipa xua barapomonaе peyaputaewa tsane xua bapon xaniwaicha exanaena pocotsiwa bayatha yabara tsiw̄nae muxu duta Abrahamtha. Daxota Na-com yabara tsiw̄nae muxu duta pia w̄ntha. ¹⁸ Ainya coyenewabe Nacom exana po coyenewabe xua jopa itac̄paetsi xua ichawa yabara jume toxeinchiya exana. Meje baxue: Icha coyenewa Nacom yabara tsiw̄nae muxu duta; icha coyenewano xua Nacom pia w̄ntha yabara paebe xua pocotsiwa exanaena. Nacom jopa itac̄paetsi xua peyabara naerabiwa barapo naxobe coyenebe. Wax-ainchi pomonaetsi xua pentatsi po coyenein barapo nacue pia coyenein, po coyenein xua abe exanatsi naca cana ex-ana. Matautano jume cow̄ntsiya w̄nae ewatatsi xua Na-com wanaca yawenaewa tsane xua naca capanenebiya abe waexanae coyenewa weya. Barapocotsiwa bayatha naca yabara tsiw̄nae muxu duta. ¹⁹ Waxainchi w̄nae ewatatsi xua Nacom bexa naca capanenebiya tsane. Wajume cow̄ntsixae baxua daxota naca j̄nt̄u coyene ayapus̄u exana. Naca itac̄pa xua wayabara jume cow̄ntsiwa. Waw̄nae ewatsixae baxua naca yawena xua beta jinom-patsi Nacom nexa. Baraxua icha be poxonaе jera ichi xua tuw̄tha babatabaruta pocotsiwa xua xota bichocono arewe xua jera beta perucuaenexa. Tsipei xaniwaicha w̄nae ewatatsi pocotsiwa Nacom exanapaeba, baxua

naca cana exana xua nacaewabatsi Nacomtha xua caemonaenanaexanatsi bapontha. Nacom itaboco beequiya, paparuwa peuma werena pia botha eca xua tututhiya xua pin botha ichaxota wapatsiwa tsane. ²⁰ Jesús itaboco beicha naca tsiwunaenana patopiya Nacom pexainya beicha tatsi. Bapon copiya bewa bara bepatopiyaena xua wanaca matacaponaenana xua iru wanaca itacupaewa tsane xua wapatsiwa tsane bara beicha Nacomtha. Daxota poxonaenana baxua exana Jesús naexana pepa sacerdotepin icha matha Melquisedec ichi pon caena bayatha popona.

7

Meje yabara xua Jesús pepa sacerdotepin naexana, icha matha Melquisedec ichi

¹ Bapon Melquisedec caena bayatha Salem tomara-piwi itorobiya pia pepa peewatsinchi. Matautano bapon sacerdotepin pon petsipaebin Nacomtha jivi nexa, pon Nacom xua itaboco beequiya. Abraham caibe nawirena xua poxonaenana nawabchuta xua poxonaenana yotaba ainya nacuanpiwi pomonaenana jivi itorobiya pia pepa peewatsiwichi xuano xua poxonaenana Abraham juteba barapomonaenana. Bapoxonaenana Melquisedec matenta iya, Abraham matenta iyatsi. Melquisedec Abraham jeichichi: “Barabu Nacom beta cayawenaena”, jei Melquisedec. ² Abraham nota pocotsiwan xaina pomonaenana jivi itorobiya pia pepa peewatsiwichi xua peamanayabixae poxonaenana juteba. Abraham ainyawan capana, xua diez xuanbe. Jiwana wet-satsaba tsiniya xua Melquisedec pecatsinexatsi sacerdotepinxae. Bapon Melquisedec hebreomonaenana pijumetha yabara wun caunuta xua jei: “Bapon jivi itorobiya pia pepa peewatsinchi pon xua beta peexanaenana”, jei. Bapon

Melquisedec Salem tomarapiwi itorobiya pia pepa peewatsinchi. Barichi barapo Salem wun hebreomona pi-jumetha yabara wun caunuta xua jei: “Juntema popona”, jei. Daxota barapo naxobe wunbe yabara wun caunutatsi xua jeye: “Pon jiwi itorobiya pia pepa peewatsinchi xua beta peexanaein xuano xua juntema popona”, jei xua hebreo jumetha. ³ Nacom Pejume Diwesitha Melquisedec paxa tatsi pewun jopa yabara yopitichi. Matautano pena tatsi jopa yabara yopitichi. Barichi jopa yabara yopitichi pia pamo susato jiwi tatsi. Matautano bapon jopa yabara paebichi ichaxota naexana. Matautano jopa yabara yopitichi ichaxota bapon naxuba. Bapon apara sacerdotepin xua ataya tsitecaeya pon petsipaebin Nacomtha jiwi nexa. Bapon sacerdotepin xua ataya tsitecaeya icha ichi pon Nacom Pexanto tatsi pon pepa sacerdotepin.

⁴ Payabara nanta xeinare xua bapon Melquisedec bi-chocono Abraham tsita ainya cuichi. Abraham pon wamo susatopin bapontha cata xua bayatha diez xuanbetha caewan jiwana wetsatsaba tsiniya. Baxua xua xuan Abraham cata apara xua bayatha yabara amanayaba pomonaetha pomona jiwi itorobiya pia pepa peewatsiwichi xua poxonae Abraham juteba. ⁵ Moisés pia peitorobi coyenewatha jeye: “Sacerdotepiwi pomona Levi pia pemomoxi susato jiwi tatsi, itacupatsi xua bara nota caewan pocotsiwa xua jiwi catsiba xua poxonae jiwi diez xuanbe caewan jiwana wetsaba pocotsiwan xua xuan xaina”, jei Moisés pia peitorobi coyenewatha. Barapo sacerdotepiwi baxuan exana barapo jiwitha yaitama piamona tatsi. Matautano exaneiba yaitama barapo jiwi Abraham pia pemomo susato jiwi tatsi icha barapo sacerdotepiwi ichi. ⁶ Ichitha Melquisedec jopa Levi pia pemomoxi susato jiwi tatsi. Bequein bapon jopa dapomonaeyo daichitha Abraham catsiba bapontha poxonae caewan jiwana wetsaba

tsitsiniya daxita xua diez xuanbetha jiwanan. Abraham xeina peyabara tsiwænae muxu dutsiwan, po peyabara tsiwænae muxu dutsiwan bayatha Nacom yabara tsiwænae muxu duta. Bequein Abraham xeina po peitorobi coyenewa xua itacupatsi xua jeye ichamonaetha: “Barabæ Nacom beta cayawenaena”, xua jei, ichitha Melquisedec baxua Abraham tsipaebatsi. ⁷ Jiwi ba yaputane xua ba bichocono ainya cui pon xua jeye: “Barabæ Nacom beta cayawenaena”, pon jei. Bapon bichocono ainya cui beyacaincha pon xua pebaraunchixaetsi. Daxota yaputainchi xua Melquisedec bichocono ainya cui beyacaincha xua Abraham tsipei Melquisedec tsipaeba Abraham xua Abraham tsipaebatsi. ⁸ Anoxuae po dapaethe sacerdotepiwi pomonaetha xua jiwi catsibeiba xua poxonae diez jiwana wetsabeiba, barapo sacerdotepiwi saya jiwi xua saya pewerapaewa tsane. Ichitha nama Nacom Pejume Diwesitha Melquisedec yabara paebatsi pon xua ataya tsitecaeya pepoponaein xua jopa petupaewa. ⁹⁻¹⁰ Metha jame be icha iche: Poxonae Abraham cata Melquisedectha poxonae caewan jiwana wetsaba diez xuanbe jiwana, bapoxonae cataunxuae abæ Leví jopa naexanaeyo. Matautano Leví pia pexui tatsi cataunxuae jopa naexanaeyo. Barichi cataunxuae pia pemomoxi susato jiwi tatsi cataunxuae jopa naexanaeyo. Bapon Leví pon matapainya pepa sacerdotepin canamata canaexana poxonae cotacaya ichamonaetha iræ sacerdotemonaetha naexana. Bapoxonaetha sacerdotepiwi naexanumenapona. Bapon tsipaibeiba Nacomtha jiwi nexa. Poxonaetha Abraham catsiba Melquisedectha xua poxonaetha caewan jiwana wetsaba diez xuanbe Nacom be tsitatsi xua apara be Leví iræ cata xua iræ be bara Leví pia pemomoxi susato jiwi tatsi catsiba. Poxonaetha Abraham cata Melquisedectha xua diez xuanbe caewan jiwana wetsaba, bapoxonaetha yawa muxuna cata pia

pemomoxi susato jiwi tatsi nexa bequein barapomonae jopa cataunxuae naexanaeyo.

¹¹ Sacerdotepiwi po sacerdotepiwi Leví canamata canaexana sacerdotepin, barapo sacerdotepiwi israelmonae catatsi Moisés pia peitorobi coyenewa tatsi. Daxita barapo sacerdotepiwi Aarón pia pemomoxi susato jiwi tatsi. Barapo sacerdotepiwi jopa itacupaetsi xua jiwi cana exanatsi xua penajuntũ coyene xanepana exanaewa Nacomtha xua penatsicuentsiwa yabara xua abe peexanaexae Nacomtha. Bequein sacerdotepiwi exanapona pocotsiwa itoroba barapo Moisés pia peitorobi coyenewatha ichitha awiya jopa itacupaetsi xua jiwi yawenatsi. Daxota jiwi equeicha canamatawenona icha sacerdotepin. Barapo sacerdotepin jopa bewa exanae icha Aarón pia pemomoxi susato jiwi tatsi jiwana ichi. Jame barapo sacerdotepin bewa exanaena icha Melquisedec ichi. ¹² Poxonae Nacom icha sacerdotepin cana exana be pocotsin icha Melquisedec ichi bapoxonae yawa muxuna bewa exanaena pena peitorobi coyenewa. ¹³ Barapo pena sacerdotepin pon Wanacanamataxeinaein, bapon baxua yabara paebatsi Nacom Pejume Diwesitha. Bapon apara Israel pemomoxi susato jiwi jiwana pin pomonae jiwana xua doce po bicheitobe. Ichitha bapon naexana icha bicheito dena xua Judas pia bicheito dena po bicheito dena bayatha bapana jopa jiwana naexanaeyo sacerdotepin. ¹⁴ Daxita jiwi yaputane xua barapon pon Wanacanamataxeinaein naexana Judá barompaya pia pemomoxi susato jiwi dena tatsi. Poxonae Moisés yabara paeba sacerdotepiwi Moisés jopa yabara paebiyo xua Judá pia pemomoxi susato jiwi jiwana tatsi naexanaena sacerdotepin.

¹⁵ Daxota waxainchi xaniwaicha bara yaputainchi xua barapo pena sacerdotepin naexana icha sacerdotepiwi

yaiwi, icha Melquisedec ichi pon pepa sacerdotepin. ¹⁶Bapon Cristo jopa naexanaeyo sacerdotepin xua poxoru Moisés pia peitorobi coyenewatha pepaebixae xua Leví pia pemomoxi susato jiwi jiwana tatsi bewa naexanaena sacerdotepin. Jame apara Cristo sacerdotepin naexana Nacom pia peayapusu itorobi coyenewatha xua pex-einaexae peajuntucoyenesuwa po peajuntucoyenesuwa ataya tsiteca xua jopa itacupaetsi xua peweraweracaewa. ¹⁷Nacom Pejume Diwesitha Cristo baxua yabara jeichichi: “Xam sacerdotepim naexaname ataya xua petsitecaenexa, barapo sacerdote yajiwim icha Melquisedec ichi xua sacerdotepin”, jei Nacom Pejume Diwesitha, xua Cristo yabara paebatsi.

¹⁸Nacom cana exana xua Moisés pia peitorobi coyenewa tatsi jiwi jopa canantawenonaeyo tsipei barapo coyenewa jopa xeinaeyo peayapusuwa xua jiwi cana exanatsi xua jopa pexeinaewa penatsicuentsiwa xua abe peexanaexae Nacomtha. Matautano jopa itacupaetsi xua jiwi pecanaexanaewatsi xua pecapanenebiwatsi abe pia peexanae cuiru coyene weya. ¹⁹Barapo Moisés pia peitorobi coyenewa tatsi bapana jopa itacupaetsi xua jiwi juntucoyene xanepana exanatsi Nacomtha. Daxota anoxuae pena coyenewa xeinatsi xua ainya cui beyacaincha po coyene xua copiya. Barapo pena coyenewa naca cana exana xua wunaewatatsi pocotsiwa Nacom exanapaeba xua barapo pena coyenewaxae daxota anoxuae Nacom naca yaputane xua piamonaexae tatsichi.

²⁰Nacom xainyeya yabara tsiwuna muxu duta pia pewuntha xua Cristo naexanaena sacerdotepin xua ataya tsitecaeya. Jopa nama Nacom pia pewuntha yabara tsiwuna muxu dutsiyo xua sacerdotepiwi penaexanaenexa pomona Leví pia pemomoxi susatopiwi tatsi. ²¹Ichitha

poxonae Cristo pon jiwí Pecanamataxeinaein sacerdotepin naexana, bapoxonae ichun, Cristo yabara pæbatsi Nacom Pejume Diwesitha, jeye:

“Nacom pia pewuntha yabara tsiwunae

muxu duta, ichawa jopa toxeincha

yabara exanae tsane.

Poxonae Nacom yabara tsiwunae muxu duta,

bapon jeye Pexantotha: ‘Xam sacerdotepim

xua ataya petsitecaenexa’, jei Nacom”,

jei ichun xua Nacom tapaebatsi

Nacom Pejume Diwesi.

²² Poxoru Nacom tsiwunae muxu duta xua Jesús naexanapaeba sacerdotepin daxota Nacom tsita itapeinya xeina xua exanaena xua bayatha pæba barapo pena coyenewatha. ²³ Bayatha sacerdotepiwi pinmonae tsoponae. Ichitha barapo sacerdotepiwi naitapataya werapouneiba, yawa ichamonae naexana sacerdotepiwi. Dapon aibi barapo sacerdotepiwi jiwana pon itacupatsi xua pewetsiwa pia peexanae coyenewan tsipei daxita werapouneiba. ²⁴ Ichitha poxoru Jesús ataya asu pepoponaexae daxota ataya tsitecaeya exanaena pia peexanae coyenewa icha pepa sacerdotepin ichi. Jopa nantawenonaeayo xua ichun Jesús pecoutha tanacuitatsi pon xuya sacerdotepin naexana. ²⁵ Daxota bapon ataya tsitecaeya itacupatsi xua jiwí ataya pecapanenebiwatsi pomonae xua pepatsiwa tsane Nacomtha pomonae xua Nacom peyaputaewi pejume cowantsi jiwixae Jesús. Jesús baxua exana ataya tsitecaeya asu pepoponaexae xua pewucaenexa Nacomtha xua barapo jiwí peyawenaenexatsi.

²⁶ Nacom tsita xanepanatsi xua Jesús pepa sacerdotepin naexana xaniwaicha, po sacerdotepin wacanamatawenonaexae. Yatsicaewa bapon bichocono pejuntu

coyene xanepanaein Nacomtha. Bapon Jesús jopa abe exanaeyo ichamonaetha. Nacom tsitatsi xua Jesús jopa natsicuentiyo poxoru abe jopa exanaeyo Nacomtha. Bapon Jesús seicaya exana ducuaenaebiya. Jopa exanaeyo icha be ichi pomonae abe peexana dubenanaebiyaewi. Bapon Jesús Paxa capoinchi po itaboco taju beicha po itaboco beyacaincha xua necoichatsi xua Jesús barapo itaboco beicha Paxa ainya cui exanatsi. ²⁷ Pepa sacerdotepiwi ba bewa exaneibina po coyene xua duwei jutebeiba iboto matatsuntha xua tuxusi exaneiba Nacom nexa, daxita matacabintha tsaibi. Baxuan nata exaneiba copiya abe pia peexanae coyenewan nexa. Bapoxonae cotacaya jiwi taexaneibatsi abe pia peexanae coyenewan nexa. Nama Jesús jopa barichiyo. Nama seicayiya icha coyeneya exana. Bapon Jesús pia pepon nata caenaeta xua tupa exanatsi saya bara cae cui coyenetha daxita carepaya jiwi nexa xua jiwi abe pia peexanae cuiru coyenewan tatsi nexa. ²⁸ Moisés pia peitorobi coyenewa tatsi canacui coyene exanatsi xua bara saya jiwi naexana pepa sacerdotepiwi. Barapo pepa sacerdotepiwi abe exana xua saya pecui pawí. Barapomonae jopa pejuntũ cui coyene xanepanae jiwi Nacomtha. Ichitha Nacom yabara tsiwũnae muxu duta pia wũntha xua Pexanto cana exana pepa sacerdotepin, po sacerdotepin yatsicaewa ataya tsitecaeya bichocono pejuntũ coyene xanepanaeinxae Nacomtha. Baxua Nacom exana xua yabara tsiwũnae muxu duta xua pepuya weya tatsi poxonae Moisés catatsi peitorobi coyenewa.

8

Meje yabara xua Jesús pon pejume yawenaein jiwi Nacomtha

¹ Anoxuae xua pocotsiwa xua bichocono peainya cui coyenewa meje baxue: Waxainchi xeinatsi yatsicaya pepa wasacerdotepin, pon yatsicaewa bichocono pe-juntũ coyene xanepanaein Nacomtha xuaunxuae yabara paca tsipaebatsi. Bapon eca pia peitũpanae ecaethopae-watha Nacom pia pecoxa weya tatsi, peitabocotha.
² Anoxuae Jesús nacuita Nacom pia xantheicha tatsi po pe-nacuichi coyeneya sacerdotepiwi exana Nacom pia botha tatsi xua itabocotha. Barapo bo yatsicaewa Nacom pia pexainyei bo tatsi ichaxota popona xua itabocotha. Nacom pon jiwi Pecanamataxeinaein exana barapo bo. Jiwi jopa exanaeyo barapo bo.

³ Nacom daxita carepaya pepa sacerdotepiwi yabara tsiwũn dubatsi xua jiwi petaexanaenexa tsaibi tsainchi po coyene pocotsiwa xua jiwi amanaya pecatsiwa Nacomtha. Matautano barapo pepa sacerdotepiwi yabara tsiwũn dubatsi xua jiwi petaexanaenexa tsaibi tsainchi po coyene xua duwei pejutebiwa pocotsi duwein xua jiwi amanaya pecatsiwa Nacomtha xua abe peexanaexae. Daxota Jesús irũ bewa bara ichiya exanae xua Nacom taexanatsi ichi sacerdotepiwi ichi poxonae Nacom taexanatsi. ⁴ Icha metha barapo dapaetha Jesús poponaetsipa barapo irathe poxonae irũũ jinompa barapo sacerdotepiwi po sacer-dote Aarón yaiwi jopa itacũpaetsipaetsi xua cana exainchi pepa sacerdotepin. Tsipei cataunxuae barapo irathe sacerdotepiwi yaiwi exanapona pocotsiwa Nacom nexa xua Moisés pia peitorobi coyenewatha pecui itorobixae. ⁵ Ichitha barapo sacerdotepiwi tanacuita be pocotsiwa xua saya penajũpae coyenewa xua jopa pexainyei coyenewa. Pocotsiwa jame xua pexainyei coyenewa, baxua jame Jesús exana peitabocotha. Pocotsiwa xua barapo sacerdotepiwi tanacuita saya be penajũpae coyenewa ichitha xaniwaicha jopa najũpaeyo xua be pocotsiwa Jesús

exana peitabocotha. Baxua yaputainchi poxonae Nacom Moisés tsipaebatsi. Poxonae Moisés muxu pecuaranotsi anseraboco xua ichaxota jiwi wūnae jainteibina Nacomtha bapoxonae Nacom Moisés tsipaebatsi. Nacom jeye: “Yabara nanta xeinare xaniwaicha xua daxita beta neexanaenexa anseraboco xua bayatha pocotsiwa yabara catsita itapeinya xeinatsi demxuwatha. Barapocotsi anserabocotontha seicaya jiwi newūnae jainchina”, jei Nacom. ⁶ Nama Cristo, yatsicaya pon wasacerdotepin, bapon exana itaboco beicha pocotsiwa xua yatsicaewa bichocono peainya cui coyenewa. Barapo coyene bichocono ainya cui beyacaincha po coyenewa xua peru coyenewa xua po coyeneya icha sacerdotepiwi exaneiba barapo irathe. Cristo jiwi yabara jume yawenatsi Nacom beicha xua jiwi pepatsinexa Nacomtha. Barapo pena coyenewa Nacom yabara tsiwūnae muxu duta xua bichocono wūnae beyacaincha barapo peru coyenewa po coyenewa pocotsiwa sacerdotepiwi exaneiba. Barapo pena coyenewa jiwi jūntū coyene xanepana exanatsi Nacomtha. Ichitha barapo peru coyenewa jopa daichiyo.

⁷ Bayatha peru petsiwūnae yabara muxu dutsiwa Nacom Moisés yabara tsiwūnae muxu dutatsi. Icha barapo coyenewa xeinaetsipa peayapusūwa xua daxota jiwi beta jūntū coyene xanepana exanatsi Nacomtha, metha jopa nantawenonaetsipae icha pena petsiwūnae muxu dutsiwa. ⁸ Ichitha Nacom tane xua barapo jiwi jopa pejūntū coyene xanepanae jiwi bapontha poxonae barapo peru peyabara tsiwūnae muxu dutsiwa xeina. Daxota ichūn Nacom Pejume Diwesitha jeye:

“Nacom jeye: Maticabin othopaena, po maticabintha pena petsiwūnae muxu dutsiwa exanaein Israel nacuapiwi pia pemomoxi susato jiwitha tatsi irū Judea nacuapiwi pia pemomoxi

susato jiwitha tatsirũ.

⁹ Jopa bara jũta coyeneya ichin tsane poxonaẽ matha icha ichin painya amo susato jiwitha. Barapo coyene barapomonaetha catan poxonaẽ matacaponan Egipto nacua weya. Daichitha barapomonaẽ jopa nacui yabara wũnaetsiyo xua peexanaenexa pocotsiwa itoroban poxonaẽ catan barapo peyabara tsiwũnaẽ muxu dutsiwa barapomonaetha. Daxota barapomonaẽ punapentan, xua jopa tayawenaewa tsane, jei Nacom”, jei ichũn.

¹⁰ Equeicha ichũn jeye:

“Nacom jeye: Barapo peyabara tsiwũnaẽ muxu dutsiwa Israel nacuamonaetha, poxonaẽ barapo matacabin wetsina bara baxua exanaein. Janje: Jiwi pejũntũ coyenewatha ichaxota nanta xeina taitorobi coyenewa baxota dubin. Bapoxonaẽ barapomonaẽ neyaputaena yawa nejume cowũntsiya jejei tsane. Tacoutha barapomonaẽ pia Nacom tatsi naexanaein. Barapomonaẽ tamonaẽ naexanaena.

¹¹ Dapon aibi pon bewa cuidubina ichũnthã xua xan yabara, xuano xua cuidubina pia jitontha xua xan yabara, mataũtano xua cuidubina peweicho xua xan yabara petana neyaputaewanexa tsane.

Jopa bewa cuidubi tsane barapomonaẽ tsipei daxita jiwi neyaputaena pomonaẽ pecui pawĩ jiwi, irũno pomonaẽ peainya cui jiwi.

¹² Xan barapomonaẽ cui yabara jũntemainaein abe pia peexanaẽ cuiru coyenein tatsi, xua jopa pexeinaewa tsane xua tana netsita natsicuentsiwa xua abe peexanaewaxaẽ.

Bapana ataya equeicha jopa yabara nanta
xeinaein tsane barapo abe peexanae
cuiru coyenein, jei Nacom”, jei ichun
Nacom Pejume Diwesitha xua saya
Nacom tapaebatsi.

¹³ Nacom yabara paeba pena peyabara tsiwunaе muxu
dutsiwa tsipei po peyabara tsiwunaе muxu dutsiwa copiya
Moisés yabara tsiwunaе muxu dutatsi saya peru jume.
Pocotsiwa ba peru coyenewa ba saya weraweraca. Daxota
barapo peru peyabara tsiwunaе muxu dutsiwa saya iru
weraweraca.

9

*Meje yabara xua Nacom pin pia bo tatsi po bo xua itabo-
cotheicha uncua xuano iruru po bo xua po irathe tsique
uncua*

¹ Nacom copiya Moisés yabara tsiwunaе muxu du-
tatsi. Barapo peyabara tsiwunaе muxu dutsiwa peitorobi
coyenein xeina xua pocotsi coyeneya israelmonae bewa
exanaena poxonae nacaetuta xua wunaе pejainchinexatsi
Nacom. Matautano barapo peyabara tsiwunaе muxu
dutsiwa itoroba xua jiji xeina po bo xua Nacom pia
bo tatsi xua po irathe. ² Barapo Nacom pia bo jiji
exana duwein pebocoton xua be anseraboco. Barapo
anseraboco ainya tutube xeina. Po tutu copiya dena
pewun: “Nacom pia tutu po tutu ainya cui tutu xua
jopa pexeinaewa peabe cuiru”, jei. Barapo tututha
uncua penainto po penainto itanatanota penasiwa.
Matautano barapo tututha uncua xua pexaethopaewa
po pexaethopaewatha xua baxota jeba pan, po pan xua
Nacom catatsi. ³ Paparua xua dutsica barapo paparuwa
peuma werena icha tutu xeina po tutu pewun: “Yatsi-
caewa Nacom pia tutu po tutu bichocono pepa peainya
cui tutu xua jopa xeinaeyo peabe cuiru”, jei. ⁴ Barapo

tututha uncuá xua be pecaxaethopaewa xua u penainto xua oro wun nainto. Baraxota yubeibiya tauteibathopa petuxueiwa po petuxueiwa tuxusi tuxuei benata poxonae tauta. Matautano barapo tututha uncuá xua be caja po caja pewun: “Nacom pia peyabara tsiwunaé muxu dutsi caja”, jei. Barapo caja pewma weya daxita matapaeicha caxueba oro naintontha. Barapo caja juntututha eca coroto xua oro nainto. Barapo corototha tsijuntutu boca po pexaewa pewun maná matawun xua itaboco pia pexaewa. Matautano barapo caja juntututha boca penacobenababi naewa po penacobenababi naewa bayatha Aarón xeina. Barapo naewa bayatha Nacom xuwa exana xua tsiwixi pirururujei poxonae pexeinya petsita itutsi coyene exana pia peayapusu itorobi coyeneyatha. Matautano barapo caja juntututha bobena iboton po ibotontha mata tinaduba Moisés pia peitorobi coyenewa. ⁵ Barapo caja pemata xatatsiwa jumatha nacueyatabe ecabe ainya querubinbe matawunbe xua jumope canaxobiya exana oro nainto, ponbe be matatsunpinbe. Barapo ainya querubinbe matawunbe yabara caunuta xua Nacom baxota eca. Barapo ainya querubinbe matawunbe naitama taecabe yawa nacuarafe yeyetecabe xua itata barapo caja pemata xatatsiwa. Matautano irabe tayecarecabe ichaxoia pejana nunbabareca po jana duwein jana. Barapo duwein sacerdotepin bexuba jiwi abe pia peexanae cuiru coyenein tatsi nexa. Anoxuae baxua yabara equeicha jopa bepaca tsipaebichi.

⁶ Daxita nacui wunaeta pocotsiwa xua barapo tutubetha nexa. Baroxonae sacerdotepiwi jojoneibeibiya daxita matabi po tututha xua copiya dena. Barapo sacerdotepiwi barapo tututha exaneiba pia penacuichiwa. ⁷ Ichitha nama po tutu dabeya saya meisa joniyeiba pon pepa sacerdotepin xua saya caetotha tsaibi xua

daxita weithan tsaibi. Poxonae barapo pepa sacerdotepin barapo tutu iya joniya bewa nata cajoniyaena duwein jana. Barapo jana nūnūbaba ichaxota querubinbe matawūnbe itabarayo deca xua bapon abe pia peexanae cuiru coyenewan tatsi nexa xuano xua irū jiwī abe pia peexanae cuiru coyenewan tatsi nexa xua poxonae jiwī jopa nacui yabara yaputaeyo. ⁸ Peyabara exanaewa daxita baxuan Nacom pia Pejumope tūnaxū tatsi naca cuiduba xuaje: Poxonae cataunxuae sacerdotepiwī taexana dubenanaebiya Nacom po tututha xua copiya dena, jiwī jopa copatsichi xua pata po tutu dabeya ichaxota Nacom popona. ⁹ Daxita pocotsiwan barapo anserabocototha caena bayatha exana yabara caunuta xua anoxuae wayabara yaputaenexa baxua xua pocotsiwa anoxuae exana. Jiwī Nacom wūnae jainteibatsi poxonae sacerdotepin exaneiba pocotsiwa xua jiwī pecatsiwa Nacomtha xuano xua poxonae exaneibano xua duwei pejutebiwa xua tuxusi exana Nacom nexa. Bara bequein jiwī baxua exaneiba ichitha cataunxuae pia jūntū coyenein tatsi cana exanatsi xua awiya yabara nanta xeina dubenanaebiya abe pia peexanae cuiru coyenein tatsi. Barapo coyene po coyene jiwī exana jopa beta jūntū coyene xanepana exanaetsi xua jopa penatsicuentisiwa tsane Nacomtha xua abe peexanaexae. ¹⁰ Barapo peru peitorobi coyenewa xua Moisés pia peitorobi coyenewa tatsi jiwī jopa yawenaetsi xua penajūntū coyene xanepana exanaewa Nacomtha. Saya apara yabara paeba xua jiwī bewa pocotsiwa xaibina poxonae nabaneiba, matautano xua xuan pocotsiwa bewa apeibina. Matautano jiwī itorobatsi xua po coyenein yabara xua jiwī beta penaperū xainwaetsiya nowaewa yabara pia wūnae jainteibichi Nacom. Barapo coyenein xua saya jiwī bewa cana exanae pia pepontha beya xua anoxuae Nacom pena coyenewa equeicha exana.

¹¹ Nama Cristo patopa pon pepa sacerdotepin. Bichocono yatsicaewa pexeinya coyenewa xua pena coyenewa nacata capatopa po coyenewa xua anoxuae waxainchi xeinatsi. Po tutu ichaxota bapon nacuiteiba icha pepa sacerdotepin ichi xua itabocotheicha bichocono wūnae tsipei Nacom daxita matapaeicha wetsiya exana. Barapo tutu bichocono wūnae beyacaincha po tutu ichaxota sacerdotepiwi tanacuita Nacom xua barapo cae pin nacuathe. Jiwi jopa acabiyo barapo tutu xua itabocotheicha tsipei barapo tutu jopa apara po cae pin nacuathe tsique nexiyo. ¹² Cristo joniya ichaxota yatsicaewa Nacom pia xantha. Bara xoteicha Cristo jopa caponaeyo duwein jana po duwein pewun chivo, xuano xua vaca jana jopa caponaeyo xua penun jana, xua pebto jana. Saya jame Cristo Nacom tsita itutatsi xua bapon jiwi tsitupatsi xua abe pia peexanae coyenewan tatsi. Bapon Cristo saya bara cae coyenewatha joniya baxoteicha xua daxita carepaya jiwi nexa. Daxota bapon Cristo bara ataya tsitecaeya naca capanepa. ¹³ Sacerdotepiwi ba nota vaca pebton pia pejanan, yawa chivo pia pejana xuano ipuna xua poxonae tautatsi vaca pesowatiyo peweinyo. Sacerdotepiwi mata wenunubaba jiwi daxita baxuantha pomonaetha pomonae xua abe peexanae cuiru coyenein peexanaewixae. Bara bapoxonae barapo coyene jiwi itacupatsi xua cana exanatsi xua jopa penataxobiwa pia pepontha bequein awiya xeina penatsicuentsiwa. ¹⁴ Bequein bara baxuan barapo jiwi tsiwiyo yawenatsi xua jopa petaxobiwatsi pia pepontha ichitha nama Cristo pia pejana tatsi barapomonae bichocono yawenatsi. Cristo pejana bichocono peayapusu coyenewa xeina beyacaincha xua duwein pejana. Nacom pia Pejumope tunaxu tatsi po jumope ataya tsitecaeya popona barapo pejumope tunaxu tatsi Cristo yawenatsi poxonae saya Cristo

nayabara cui copata xua bara pebexubinexatsi poxonae pejana pichapabarena pewan weya petupaewatha. Bapon Cristo jopa bapana exanaeyo peacoyenebewa. Cristo wanaca tsitupaexae Nacom naca juntu coyene xanepana exana. Daxota Nacom jopa tsita natsicuentichi abe waexanaexae. Wajuntu coyene equeicha jopa yabara wanaca tsipaebinexa abe waexanae coyene. Daxota jopa bewa ponae tsainchi ichaxota ataya atene tsaiabi pomonae jopa pejume cowuntsiwi. Anoxuae jame naca itacupa xua ajuntusuya taexana dubenanaebiyatsi Nacom pon xua ataya tsitecaeya asu pepoponaein.

¹⁵ Daxota bapon Cristo naexana pon nacata paeba Nacomtha yawa pon naca tsipaeba Nacom nexa. Bapon Cristo nacata catsica Nacom pia pena peyabara tsiwuna muxu dutsiwa tatsi. Bapon naca cana exana xua daxitatsi caemonae naexanatsi Nacomtha. Poxonae naca tsitupa Nacom yabara junteina abe peexanae cuiru coyene po peabe exanae cuiru coyenein xua jiwi caena bayatha exana poxonae cataunxuae exanapona po coyene bayatha Nacom Moisés yabara tsiwuna muxu dutatsi xua peru peyabara tsiwuna muxu dutsiwa. Daxita pomonae Nacom pewabixae barapomonae catsibinchi peajuntuyapuswa po peajuntuyapuswa xua ataya tsitecaeya tsane xua bayatha Nacom peyabara tsiwuna muxu dutsixae barapomonaetha. ¹⁶ Poxonae pebin ba ichichipa cata pia pecopiniwa ichamonaetha xua poxonae tupaena, copiya matha yabara caununaya wun tinaduba paperatha pomonae xua pecopiniwa xeinaewa tsainchi. Pomonae xua pecopiniwa xeinaewa tsainchi barapomonae bewa tsita itapeinya xeinaena xua barapo pebin xaniwaicha bara tupa xua poxonae beya pewunaeya tsane xua pecopiniwa notsinexatsi pon xua tupa. Bapoxonae barapomonae bara itacupatsi xua pexeinaewa pocotsiwa xua bapon xeina pon tupa. ¹⁷ Barapo papera,

po paperatha bayatha pebin nacopiniwa yabara jume tinaduba cataunxuae jopa ainya cuiyiyo poxonae abũ cataunxuae bapon pozona tsipei jopa copiniwa notichi barapomona. Saya jame poxonae bapon yatsicaewa tũpaba bapoxonae jame ainya cui barapo papera, tsipei barapomona itacũpatsi xua pexeinaewa tsane pocotsiwa bapon xeina. ¹⁸ Barichi barapo copiya peyabara tsiwũnae muxu dutsiwa. Pewũnaeya tsane xua poxonae jiwi xeinaena pocotsiwa bayatha Nacom Moisés yabara tsiwũnae muxu dutatsi sacerdotepin bewa matha duwein bexubina xua bapoxonae barapo coyene jiwi pexeinaewa tsane. ¹⁹ Moisés daxita pia peitorobi coyenewan yabara paeba daxita jiwitha. Nexata bapon pena xua oveja na xua tsobia naewiyotha opi yarabaxuba, po naewiyotha pewũn hisopo naeyo. Bapon mene muxunaxuba vaca jana poyo peweinyo pebtiyo xuano xua muxunaxuba chivo jana. Bapoxonae baxuan bapon Moisés nũnũbaba Nacom Pejume Diwesitha. Mataũtano daxita jiwitha mata wenũnũbaba. ²⁰ Bapoxonae Moisés daxita jiwitha jeye: “Barapo jana po janatha paca mata wenũnũbabatsi apara Nacom itoroba xua tapacata exanaewatsi tsainchi. Baxua paca tsita itapeinya xeina xua Nacom xaniwaicha bara pacata exanaena pocotsiwa pia peyabara tsiwũnae muxu dutsiwa”, jei Moisés. ²¹ Barichino Moisés exana xua anseraboco mata wenũnũbaba pejanatha. Mataũtano muxuna mata wenũnũbaba xua xuan barapo anserabocototha tututha umena pocotsiwan sacerdotepiwi canacuiteiba poxonae jiwi nacaetuteiba xua Nacom wũnae pejainchinexatsi. ²² Moisés pia peitorobi coyenewantha tatsi itoroba xua bara imoxoyo daxita coyeneintha bewa pejanantha mata wenũnũbabi xua daxita baxuan Nacom jopa petsita nataxobinexatsi. Nacom jopa yabara jũntemainayo jiwi abe pia peexanae cuiru coyenein tatsi icha jopa pejana

epa-epacaeyo xua barapo jiwi nexa.

Meje yabara xua Cristo tsitu pa jiwi abe pia peexanae cuiru coyewewan tatsi

²³ Sacerdotepiwi bewa jutebina duwei pemata wenunubabinexa pejanatha anseraboco. Bapoxonae Nacom petsita xanepanaenexatsi xua jopa nataxobiyo barapo anseraboco xuano xua xuan tututha umena. Barapo coyene saya yabara caunuta xua yatsicaewa pepa coyewewa Cristo exana peitabocotha. Ichitha nama barapo yatsicaewa pepa coyewewatha peexanaenexa peitabocotha jame bewa pejana epa-epacae pejana pon pejuntũ coyene xanepanaein pon peainya cuin pia pejana tatsi xua Nacom tsita jiwi xanepanatsi xua jopa penatsicuentiwa xua abe peexanaexae Nacomtha. Barapo jana bichocono ainya cui beyacaincha duwein jana po jana xua sacerdotepiwi nunubaba po cae pin nacuathe. ²⁴ Poxonae Cristo joniya Nacom pin pia botha tatsi xua itabocotha jopa joniyaeyo po bo saya jiwi exana po cae pin nacuathe xua Nacom pin pia bo tatsi. Barapo bo xua Nacom pin pia bo saya yabara caunuta xua yatsicaewa peitabocotha xeina pepa Nacom pin pia bo tatsi. Jame Cristo joniya Nacom pin pia botha tatsi, xua Nacom pia nacuatheicha tatsi xua itabocotha. Baxoteicha anoxuae Cristo naituta Nacomtha xua wanacata tsipaebinexa Nacom peitabaratha. ²⁵ Pon pepa sacerdotepin bewa joniyaena bara saya caetha tsaibi xua daxitan weithan tsaibi ichaxota po tutu yatsicaewa Nacom pia tutu xua po tutu bichocono yatsicaewa peainya cui tutu xua barapo anserabocotha. Barapon pejana capaneiba barapo tututha xua duwein jana xua jopa barompaya pia pejana tatsi. Nama Cristo jopa nantawenonaeyo xua nayabara cui copata xua matowa tupa pecana exanaewatsi xua jiwi

abe peexanae cuiru coyenein tatsi nexa. ²⁶ Icha baxua tsipae bapoxonae bapon matowa tupa exaneibichipatsi xua bexubeibatsi xua poxonae Nacom aena barapo cae pin nacue forota xua beya anoxuae. Ichitha nama anoxuae weta xua peru dapae tsipei bapon Cristo patopeica barapo cae pin nacuathe petupaenexa xua saya bara cae coyenewatha ataya petsitecaenexa tsane. Bapon Cristo naetotha tsitupa jiwi xua Nacom jiwi peyabara cui juntemainaenexatsi abe pia peexanae cuiru coyenein tatsi. ²⁷ Daxita jiwi ba werapouneibina saya caetotha. Bapoxonae pirapae Nacom yabara paebina daxita jiwi xua penatsicuentisiwa xua abe peexanaexae. ²⁸ Barichiru, icha jiwi ichi Cristo saya caetotha tsitupa jiwi pinmonae, xua Nacom jiwi abe pia peexanae cuiru coyenein tatsi pecayabara juntemainaenexa tsainchi. Equeicha bexa tsane patopeicaena po cae pin nacuathe. Jopa tsipatopeicae tsane xua equeicha petsitupaewa tsane jiwi abe pia peexanae cuiru coyenein tatsi. Jame tsipatopeicaena xua pecapanenebiyaenexa pomonaetha pomonae pia pewanae ewatsi jiwixaetsi xua bapon pepatopaewa po cae pin nacuathe tsique.

10

¹ Moisés pia peitorobi coyene tatsi, baxua saya yabara caunuta xua yaputane wanaca exanaenexa po coyene xua wanae po coyene xua bexa Nacom exanaena itabocotheicha. Barapo coyene, jopa pepa coyenewiyo poxoru jopa jupaeyo po coyene xua Nacom yatsicaewa xeina itabocotheicha. Moisés pia peitorobi coyenewa tatsi jopa itacupaetsi xua jiwi pejuntu coyene xanepana exanaewatsi Nacomtha pomonae wanae jainteiba Nacom. Bequein pepa sacerdotepiwi daxita weitha exaneiba xua duwei jutebeiba jiwi abe pia peexanae cuiru coyenein tatsi nexa daichitha cataunxuae jopa itacupaetsi xua jiwi

jũntũ coyene xanepana exanatsi xua jopa pexeinaenexa xua penatsicuentisiwa xua abe peexanaexae Nacomtha. ² Icha Moisés pia peitorobi coyene tatsi jiwi jũntũ coyene xanepana exanaetsipatsi Nacomtha bapoxonae sacerdotepiwi jopa equeicha nantawenonaetsipae xua equeicha pejutebeibiwa duwei jiwi abe pia peexanae cuiru coyenein tatsi nexa. Icha jiwi caetotha jũntũ coyene xanepanaetsipa Nacomtha, bapoxonae jiwi jopa natsicuentisipae xua abe peexanaexae Nacomtha. ³ Ichitha poxonae barapo sacerdotepiwi jutebeiba duwei jiwi abe pia peexanae cuiru coyenein tatsi nexa bequein baxua exana cataunxuae jiwi cana exanatsi xua yabara jũntanaina barapo abe pia peexanae cuiru coyenein tatsi. Jiwi yabara jũntanaineiba baxuan daxita weitha poxonae duwein jutebeibatsi barapo jiwi nexa. ⁴ Vaca pebto pia pejana tatsi yawa chivo pia pejana tatsi jopa bapana jiwi jũntũ coyene wenotichi abe pia peexanae cuiru coyenein tatsi xua jopa penatsicuentisiwa nexa Nacomtha xua abe peexanaexae.

⁵ Daxota poxonae Cristo patopa po cae pin nacuathe tsique, Cristo jeye Nacomtha:

“Xam jopa ichichipaem po coyene xua duwein pebexubiwa jiwi abe pia peexanae cuiru coyenein tatsi nexa.

Matautano jopa ichichipaem xua po coyenein xua jiwi amanaya necacatsiwa.

Jame pebaxuanexa yatsicaewa pepa jiton necana exaname xua naexanan, tatsitupaenexa jiwi abe pia peexanae cuiru coyenein tatsi nexa.

⁶ Xam jopa cajũntũ coyene weiweina exanaeyo poxonae duwein ompin tautatsi xuano xua pexaewa tauta petuxusi exanaenexano xua xam neyabara jũntemainanexa jiwi abe pia

peexanae cuiru coyenein tatsi.

⁷ Bapoxonae xan Cristo, janje:

‘Xam Tanacom.

Xan xote po nacuathe patopeicanje taexanaenexa

xua pocotsiwa ichichipame be pocotsi

coyeneya necui yabara tina jinya diwesitha’,

jan”, jei Cristo.

⁸ Copiya Cristo paeba xua jeye: “Xam jopa ichichipaem

yawa jopa cajuntũ coyene weiweina exanaeyo po coyene

xua poxonae jiwi bexuba duwein xuano poxonae ex-

aneiba po coyene poxonae jiwi amanaya cacatsibeiba.

Mataũtano jopa ichichipaem poxonae duwein ompin tau-

tatsi xua jiwi abe pia peexanae cuiru coyenein tatsi

nexa”, jei Cristo. Baxua Cristo paeba tsipei Moisés pia

peitorobi coyenewatha itoroba xua jiwi bewa exanaena

barapo coyenein Nacom nexa. ⁹ Equeicha bapoxonae

Cristo cotacaya jeye: “Xan xote po cae pin nacuathe

patopeicanje taexanaenexa pocotsiwa ichichipame”, jei.

Poxonae Cristo baxua caunutsiya paeba copiducua cana

exana po coyene peru coyene. Cristo anoxuae equeicha

pecoutha pena coyene exana poxonae naetotha tsitupa

jiwi abe pia peexanae cuiru coyenein tatsi. ¹⁰ Nacom naca

juntũ coyene xanepana exana wanaca cana exanaenexa

piamonae tatsi poxoru Jesucristo exana pocotsiwa Nacom

peichichipaexae. Jesucristo pia pepon nacaenaeta Na-

comtha xua naetotha petsitupaenexa daxita jiwi abe pia

peexanae cuiru coyenein tatsi xua bara cae coyenewatha

xua ataya petsitecaenexa tsane.

¹¹ Daxita sacerdotepiwi pomonae judiomonae daxita

matacabi exaneiba xua duwein pebexubiwa, bequein

barapo coyenewa jopa itacupaetsi xua jiwi juntũ coyene

wenotatsi abe pia peexanae cuiru coyenein tatsi. ¹² Nama

Jesucristo bara cae coyenewatha exana poxonae naetotha

tsitupa jiwi abe pia peexanae cuiru coyenein tatsi, xua

bara ataya tsane. Poxonae Cristo baxua nacui weta Nacom pia pecoxatheicha tatsi equiya xua itabocothelicha. ¹³ Baxoteicha Cristo abũ ewata beya poxonae abũ tsane poxonae Nacom cana exanaena xua Cristo cana exanaeinchi xua pecanamataxeinaenexa pia peaitafaetabi jiwichi. ¹⁴ Cristo piamonae jũntũ coyene xanepana exana xua ataya tsane poxonae naetotha tsitũpa cae coyenewatha. Barapomonae pomonae xua Nacom tsitatsi xua jopa xeinaeyo penatsicuentisiwa pomonae piamonaexae tatsi. ¹⁵ Nacom Pia Pejumoŕe tũnaxũ tatsi baxua yabara irũ naca tsipaeba bayatha Nacom Pejume Diwesitha, jeye:

¹⁶ “Matacabin othopaena po matacabintha xan tayabara tsiwũnae muxu dutsiwa xua pena coyenewa exanaein barapomonaetha. Jiwi pia jũntũ coyenewantha xua ichaxota nanta xeina taitorobi coyenewa baxota dubin”, jei Nacom pia Pejumoŕe tũnaxũ tatsi.

¹⁷ Bapoxonae equeicha Nacom pia Pejumoŕe tũnaxũ tatsi jeye:

“Bapana ataya equeicha jopa yabara jũntanainaein tsane jiwi abe pia peexanae cuiru coyenein tatsi”, jei Nacom pia Pejumoŕe tũnaxũ tatsi, Nacom Pejume Diwesitha.

¹⁸ Daxota poxonae Nacom yabara jũntemaina jiwi abe pia peexanae cuiru coyenein tatsi, equeicha jopa nantawenonaeyo xua jiwi duwein pebexubiwa xua tuxusi exana Nacom nexa xuano xua po coyene exaneiba xua po coyene Nacom amanaya pecatsibeibiwatsi.

Meje yabara xua waxainchi bewa wajũntũ coyeneyatha nanta xeinaetsi xua bara apara imoxoyo itiya jinompatsi Nacom

¹⁹ Tamonae pam, daxota anoxuae naca itacupa xua jopa junuwiya patsi tsainchi itabocotheicha ichaxota yatsicaewa Nacom pia tutu, po tutu bichocono peainya cui tutu. Daxota baxua naca itacupa tsipei Nacom yabara copata xua bara Jesucristo naca tsiwanaya patopa barapo tututha pejana pichapabarenaexae poxonae naetha naca tsitupa. ²⁰ Anoxuae naca itacupa xua wapatsiwa Nacomtheicha pena juntu coyene waxeinaexae po pena juntu coyene ataya ayapusu xua poxonae Cristo wanaca tsitupaexae. Baraxua be poxonae metha Cristo nacata pataxubichipa paparuwa po paparuwa yacaincha ducua Nacom pia tutu po tutu yatsicaewa peainya cui tutu. Daxota jojoniyaeinchi wajinompaeincha Nacomtha. ²¹ Bapon Jesús, yatsicaewa wasacerdotepin, pon canamataxeina Nacom pia bo tatsi xua itabocotheicha. ²² Daxota bewa wajuntu coyenyatha nanta xeinaetsi xua bara apara imoxoyo itiya jinompatsi Nacom, xua yatsicaewa xainyeya wajuntu coyene xanepanaexae bapontha. Matautano bewa wajuntu coyenyatha nanta xeinaetsi xua bara apara imoxoyo itiya jinompatsi Nacom xanepanaya wajume cowuntsiya jinompaexae. Matautano bewa wajuntu coyenyatha nanta xeinaetsi xua bara apara imoxoyo itiya jinompatsi Nacom tsipei jopa juntu coyene auratsi xua jopa watsita natsicuentisixae xua abe waexanaexae. Matautano bewa wajuntu coyenyatha nanta xeinaetsi xua bara apara imoxoyo itiya jinompatsi Nacom tsipei poxonae ichamonae naca bautisaba meratha tsita itapeinya xeinatsi xua Nacom bayatha naca juntu coyene xanepana exana. ²³ Barabu naajuntucoyenesu exainchi xua jopa junuwiya wayabara paebiwa tsainchi wawuna ewatsiwa. Baxua exanaponeinchi tsipei bara yaputainchi xua Nacom bara exanaena pocotsiwa bayatha yabara naca tsiwuna muxu duta xua

jopa yabara ainya unthutontsi. ²⁴ Barabu yabara nanta xeinaeinchi po coyenewa xua nantiya nacui tsacabinchi xua wanayawenaewatsi. Bapoxonae nantiya naantobe tsainchi, matautano xua xanepanaya beta nantiya nata exanaeinchi. ²⁵ Jopa bewa bara juta coyeneya ichiya exanaetsi be pocotsimonae waxainchi jiwantsi pomonae jopa pateibiyo poxonae nacaetuteibatsi xua poxonae Nacom wawanae jainchinexa. Ichitha jame bewa nantiya najuntu coyene tsacabichi xua juntea wajinompawatsi. Barapo coyene bewa exanaponaetsi beyacaincha xua po cui coyene copiya bayatha. Baxua exanatsi tsipei anoxuae yaputainchi xua matabi jopaena, po mataqueitha pon jiwu Pecanamataxeinaein patopaetsica.

²⁶ Tsipei icha ichamonae waxainchi jiwantsi icha barapomonae awiya abe exanapona xua pocotsiwa peichichipaexae xua abe exana xua poxonae bequein peyaputaewatha po coyene pexainyei jume, nama icha coyenewa ajibi, xua ichun equeicha petsitupaenexa barapo peabe coyenewa. ²⁷ Saya jame meisa tanacopatatsi pomonae awiya abe exanapona xua matabi cunuwa po mataqueitha poxonae Nacom yabara paebina jiwu xua penatsicuentsiwa xua abe peexanaexae. Matautano tanacopatatsi xua isoto yabara cunuwa, po isoto bichocono atou, po isototha Nacom weraweraca cana exanaena daxita pomonae pia peaitafaetabi jiwichi. ²⁸ Po pebin jumefeba po coyene Moisés itoroba pia peitorobi coyenewatha, xua poxonae nacueyatabe pebinbe ichacuihitha poxonae acoibi poyobe baponbe yabara paebabe: “Bapon pajume tan poxonae jumefeba”, jei, bapoxonae bapon bewa tupaena. Tsipei pomonae bapon yabara paebatsi xua penatsicuentsiwa xua abe peexanaexae, barapomonae tsita itapeinya xeinatsi xua bara bapon xainyeya abe exana. Daxota bapon bewa tupaena tsipei bara-

pomonaē jopa yabara nanta xeinaeyo xua bapon peyawe-naewatsi. ²⁹ Xuaje payabara nanta xeinare: Nacom bichocono atene exana pomonaetha pomonaē Pexanto tatsi itaweta. Matautano atene exana pomonaetha pomonaē abe yabara paeba xua pinae Jesús pejana jopa ainya cuiyo bequein Jesús tsitupa jiwi. Jesús pet-situpaexae daxota Nacom yabara tsiwūnae muxu duta xua jiwi pejuntū coyene xanepana exanaenexatsi Nacom. Matautano barapomonaē jopa natsicuentisi tsane xua abe peexanaexae. Matautano Nacom atene exana pomonaetha pomonaē Nacom pia Pejumope tūnaxū tatsi tsūmū jumeya barū paebatsi po pejumope jiwi yawe-natsi pia peantobexaetsi. Barapomonaē nama bichocono atene exanaeinchi beyacaincha xua ichamonaē atene exanaeinchi pomonaē jopa exanaeyo pocotsiwa Moisés itoroba. ³⁰ Waxainchi yaputainchi xua Nacom bayatha jeye: “Xan tacoya exanaein pentoma xua jiwi atene tsane abe peexanaexae”, jei Nacom. Equeicha Nacom Pejume Diwesitha jeye: “Nacom yabara paebina piamonaē xua penatsicuentisiwa xua abe peexanaexae”, jei. ³¹ Po pebin abe exana bichocono junuwa cana exanatsi poxonaē Nacom yabara paebina bapon tsipei barapo pebin Nacom tsitatsi xua bapon bara penatsicuentisiwa xua abe peexanaexae. Bapoxonaē Nacom, pon ataya asū pepoponaēin, bichocono jopa juniya atene cana exanaē tsane bapontha.

³² Bara ataya payabara jūntanainare po dapaetha poxonaē bequein aena pajume cowūntame Nacom, xua ichitha beta paexaname. Bapoxonaē awiya ichitha jūntema parubenaēbiyame poxonaē bequein ichamonaē pacata abe exana. ³³ Ichamonaē xua paxam jiwana pam barapomonaē tsūmū jumeya biatainchi xuano jiwi itūtha atene exaneibatsi. Irūrū ichamonaerū pomonaē paxam jiwana pam barapomonaē nacayabara nanta xeina xua

barapara iruru atene exaneibatsi poxonae ichamonaе atene exaneibatsi. ³⁴Paxam painya antobexae pacayabara nanta xeiname pomonaе jiwi pecubi botha jebatsi xua painya neyawenaenexa. Bequein bara ichamonaе daunweya pacata nota xua xuan daxita paxeiname, daichitha awiya cataunxuae pajuntu coyene weiweiname. Bara payaputaneme xua paxeiname itabocotheicha pocotsiwa bichocono yatsicaewa wunaе beyacaincha pocotsiwa po cae pin nacuathe paxeiname. Baxua xua pocotsiwa paxeiname itabocotheicha ataya tsitecaeya paxeinaename baxua. ³⁵Jopa pana nacui barapentsinde xua payabara jume cowunta dubenanaebiyame xua painya nepaca catsinexa pocotsiwa bayatha Nacom yabara paca tsiwunaе muxu duta. Tsipei wajume cowunta dubenanaebiyaexae tsane Nacom, baxua nexa Nacom pentoma naca catsibina xua bichocono nawita xua pia nacuatheicha. ³⁶Paxam panantawenoname xua ajuntuyapusya parubenaebiyama awiya xua jopa paaitaconaem bequein ichamonaе pacata abe exana xua painya neexanaenexa pocotsiwa Nacom ichichipa. Bapoxonaе Nacom paca catsibina pocotsiwa xua bayatha yabara paca tsiwunaе muxu duta.

³⁷Nacom Pejume Diwesitha jeye:

“Methaunxuae patopaetsica, pon bewa patopeicaena.

Jopa bayathiyo tsane.

³⁸Pon bara netsita pejuntu coyene

xanepanaein, bapon bara ataya poponaena

tana nejume cowunta ducuaenaebiyaexae.

Ichitha icha bapon equeicha caewa jopa

nejume cowantsiyo jopa xanepanaya beyabara

juntu coyene weiweinaeinyo, pocotsiwa

bapon peexanaexae”, jei Nacom.

³⁹ Ichitha nama waxainchi jopa be barapomonaetsi, pocotsimonaе equeicha caewa jopa jume cowuntsiyo Nacom. Barapomonaе Nacom weraweraca exanaena. Nama waxainchi pomonaetsi awiya jume cowunta dubenanae-biyatsi Nacom beya poxonaе wajuntũ coyenewa nacata capanepa exanaeinchi.

11

Meje yabara xua Nacom pejume cowuntsiwatsi

¹ Pon jume cowunta ducuaenaеbiya Nacom, bapon bara xaniwaicha yaputane xua xeinaena pocotsiwa wunaе ewata. Matautano pejuntũ coyene tsita najume itapeinya xeinatsi xua barapara xainyei po coyene xua barapon yabara jume cowunta bequein cataunxuae yatsicaewa jopa taeyo. ² Wamo susato jiwi xanepanaya beta yabara paebatsi xua Nacom beta yabara paeba ayapusuya pejume cowuntsiwaxaetsi.

³ Waxainchi wayabara jume cowuntsixae xua Nacom naca yawenapaeba daxota yaputainchi xua barapo cae pin nacue irũ barapo itaboco susato forotatsi, Nacom peitorobixae. Pocotsiwan xua anoxuae tainchi, Nacom forota pocotsiwan weya xua bapana jopa taetsi, pocotsiwan xua peinyaxae.

⁴ Abel pon caena bayatha popona yabara jume cowunta xua Nacom yawenapaeba. Daxota bapon duwein bexuba xua tuxusi exana Nacom nexa. Nacom tsita xanepanatsi pocotsiwa Abel exana. Daxota Nacom yabara paeba xua bara bapon pon pejuntũ coyene wunaein. Irũ Caín Abel pentapin tatsi, bapon irũ bequein pexaewa exana po coyene xua Nacom pecatsiwatsi. Daichitha barapo coyene Nacom jopa tsita xanepanaetsi. Nacom bichocono beita cui jichatsi pocotsiwa Abel exana, beyacaincha xua pocotsiwa Caín exana. Nacom baxua beita cui jichatsi tsipei Abel peyabara jume cowuntsixae pocotsiwa Nacom

exanapaeba. Bequein Abel bayatha tupa ichitha naca itacupa xua awiya wayabara nacuidubaponaewatsi pocotsiwa Nacom exanapaeba poxonae yabara yorobatsi Abel pia pejume cowuntsiwa tatsi.

⁵ Enoc pon caena bayatha popona yabara jume cowunta xua Nacom yawenapaeba. Daxota bapon Enoc pichicatsi. Nacom pichica xua bapon pecapanaenexatsi itabocothicha, xua bapon Enoc jopa petupaenexa bara po cae pin nacuathe. Enoc piamonae jopa caxinaetsi, poxoru Nacom pichica. Nacom Pejume Diwesitha paeba xua poxonae pewunaeya tsane xua pichicaeinchi Enoc, Nacom tsita xanepanatsi pocotsiwa Enoc peexanaexae. ⁶ Jopa itacupaetsi xua jiwi Nacom tsita xanepanatsi icha barapo jiwi jopa beta jume cowuntsiyo Nacom. Pon xua ichichipa imoxoyo itiya popona Nacomtha jame bewa matha yabara jume cowuntsina xua Nacom bara xaniwaicha popona. Matautano jame bewa yabara jume cowuntsina xua Nacom bara cata pocotsiwa bayatha yabara tsiwunae muxu duta pomonaetha pomonae pia pejeichiwichi xua pejume cowuntsinexatsi. Barapomonae Nacom yaputainchi.

⁷ Noé pon caena bayatha popona yabara jume cowunta xua Nacom yawenapaeba. Daxota Noé piamonae tsixana pin jera nae xua piamonae matabuxuyo pebaru nacapanepaenexa. Nacom Noé pewunaeya yabara muxuwetatsi xua pocotsiwa bexa exanaena pocotsiwa Noé bapana bayatha jopa taeyo, xua pin awubo tsane xua Nacom itorobina. Noé bara jume cowuntsiya exana pocotsiwa Nacom itoroba poxonae pin jera nae exana xua piamonae matabuxuyo pebaru nacapanepaenexa. Noé pejume cowuntsixae Nacom, bapon tsita itapeinya xeina xua pomonae barapo cae pin nacuepiwi apara abe exana poxonae jopa yabara jume cowuntsiyo xua Nacom itoroba paeba pin awubo. Nacom tsitatsi xua barapo jiwi atene

tsane penatsicuentsiwaxae jopa pejume cowuntsixaetsi. Jame Noé Nacom jantũ tsita coyene xanepanatsi pejume cowuntsixaetsi bapon. Daxota Nacom Noé piamonae matabuxũyo barũ capanepatsi.

⁸ Abraham pon caena bayatha popona yabara jume cowũnta xua Nacom yawenapaeba. Daxota poxonae Nacom pewabixae, bapon bara exana pocotsiwa Nacom itoroba. Bapon Abraham pia nacua weya pona xua peponaenexa icha nacuatha, po nacua bayatha Nacom yabara tsiwũnae muxu duta, xua bapon catapaebatsi. Bapon Abraham pia ira weya pona xua icha nacua beya pona po nacua bequein jopa yaputaeyo ichaxota pona.

⁹ Abraham peyabara jume cowuntsixae Nacom, bapon popona po iratha xua bayatha Nacom yabara tsiwũnae muxu duta. Bapon Abraham be pon penanapaincha poponaein xua icha nacua werena poponaexae xua poxonae icha nacuatha popona. Bapon Abraham poponeiba anserabocon bomũxũxitha icha Isaac ichi irũ icha Jacob ichi poxonae poponeibabe anserabocon bomũxũxitha. Abraham, irũ Isaac, irũ Jacob barapoyobe Nacom tsiwũnae yabara muxu duta barapo ira xua Nacom pecatsinexa.

¹⁰ Abraham nacui yabara wũnae ewata xua patopaena po tomaratha ichaxota xua pepu umenae bon xua Nacom pia nacuatheicha. Aparã Nacom bapon pon yabara nanta xeina xua forotsina barapo tomara po tomara xua Nacom pia coya bara exana.

¹¹ Barichi Sara Abraham piseuri tatsi yabara jume cowũnta xua Nacom yawenapaeba. Bequein bapowa acue xua jopa peitacũpaewatsi xua pexeinaewa pexui awiya jume cowũnta Nacom. Sara pejume cowuntsixae, Nacom cata barapowa catatsi peajũntũyapũsũwa, xua barapowa pepabetsinexa pexuyo. Baxua barapowa taexanatsi tsipei barapowa jume cowũnta pocotsiwa Nacom taexanaena

bapowatha xua bayatha Nacom yabara tsiwænae muxu duta. ¹² Bara barichi Abraham. Bapon bichocono amo tsecae xua bara imoxoyo petæpaewaba tsane xua jopa itacæpaetsi xua peexanaewa pexui. Daichitha Nacom copata xua bapon pexanto xeina xua daxota bapoxonae bapon pia pemomoxi jiwi tatsi bichocono pinmonae nae-naexanapona. Barapo bicheito bichocono pinmonae icha opiteimonae ichi xua bichocono nawita. Matautano barapomonae icha taetowa beno ichi xua bichocono beno cæcæjei xua mar mene itapatha. Jopa itacæpaetsi xua barapo jiwi peununaewatsi icha taetowa beno ichi.

¹³ Daxita pomonae jume cowænta Nacom barapomonae yajume cowæntsiya werapa. Abæ cataunxuae jopa catsibichi pocotsiwa bayatha Nacom yabara tsiwænae muxu duta xua pocotsiwa bapomonae catsibapaebatsi. Daichitha barapomonae yabara jume cowænta xua pocotsiwan bexa xeinaena xua Nacom bexa catsibina. Barapomonae baxuan yabara jume cowæntsiya tsita xanepanatsi. Barapomonae nantiya nayabara nanta xeina, jeye: “Waxainchi pomonae be wananapaincha jinompaewichi barapo pena nacuathe xua be icha nacua werena waponæwi, pomonætsi xua awiya jeita dubenanaebiyatsi po nacua yatsicaewa pepa wanacua”, jei daxita barapomonae. ¹⁴ Tsipei barapomonae baxua pæba, naca yaputane exana xua awiya jeitapona po nacua yatsicaewa pia nacua tatsi. ¹⁵ Barapomonae jopa apara yabara caunutsiyo ichaxota copiya po nacua weya Abraham pona. Icha metha baxua yabara pæbichipa metha bara itacæpaetsipatsi xua caewa pewarapaewa pia nacuathe ichaxota copiya bayatha jinompa. ¹⁶ Ichitha barapomonae ichichipa po nacua xua bichocono wænae beyacaincha xua icha nacuan. Baraxua xua po nacua ichichipa, apara Nacom pia nacua tatsi. Daxota Nacom

jopa auriyo xua barapomonaē yabara paebatsi xua pinae Nacom barapomonaē pia Nacom tatsi. Daxota Nacom barapomonaē tsiwūnaetatsi tomara.

¹⁷ Nacom Abraham jūntū coyene jūjutatsi peyaputaenexa icha bara metha yatsicaya jume cowūntatsi. Daxota Nacom Abraham itorobatsi xua pexanto pebexubiwa tsane icha be pocotsi coyeneya ichi xua poxonaē duwein bexuba Nacom nexa. Abraham pejume cowūntsixae Nacom daxota pexanto capana atororo beya pon yatsicaewa compa tatsi pon pewūn Isaac. Abraham muxu pexanto pebexubi icha be pocotsi coyeneya ichi xua poxonaē duwein bexuba Nacom nexa. Bapon baxua exana bequein Nacom yabara tsiwūnaē muxu duta barapo Abraham pexanto tatsi, jeye: ¹⁸ “Barapo nexanto Isaacxae nantaūtsiname nemomoxi susato jiwi”, jei Nacom. ¹⁹ Abraham jume cowūnta xua icha Isaac tūpaetsipa Nacom itacūpatsi xua equeicha Isaac caewa asū exanatsi poxonaē bequein pexanto bexubichipa. Poxonaē Abraham muxu pexanto pebexubi, apara bara be xua bayatha tūpa, mataūtano apara be xua Abraham pexanto equeicha caewa asū taexainchi.

²⁰ Barichi Isaac yabara jume cowūnta xua Nacom yawenapaeba. Daxota bapon Isaac pexantobe tsipaeba, jeye: “Barabū Nacom paca yawenaena pia paca necaantobexaēbe”, jei Isaac pexantobetha, Jacob irū Esaú.

²¹ Barichi Jacob yabara jume cowūnta xua Nacom yawenapaeba. Daxota poxonaē bapon juntucuru imoxoyo tūpaenaba barompaya tsipaebabe José pia pexantobetha tatsi xua pia pemomobexae tatsi. Bapon jeye: “Barabū Nacom paca yawenaenabe pia paca necaantobexaēbe”, jei Jacob José pia pexantobetha tatsi. Bapoxonaē bapon Nacom wūnaē jaintatsi poxonaē naewatha nabūxū babatanotsiya wūyūtanota tsipei bichocono amo tsecae.

²² Irũ José yabara jume cowũnta xua Nacom yawenapaeba. Daxota poxonaē bara imoxoyo tũpaenaba yabara paeba israelmonae. José yabara paeba xua bexa tsane Israel pia pemomoxi susato jiwi tatsi warapaena Egipto nacua weya, xua po nacuatha beya po nacua bayatha Nacom yabara tsiwũnaē muxu duta xua Nacom catapaeba. Mataũtano José pia pexui cui itoroba, xua José pia pexui piwa capanaeinchi Egipto nacua weya po nacua beya ichaxota israelmonae warapaena po nacua xua Nacom yabara tsiwũnaē muxu duta xua Nacom catapaeba.

²³ Moisés pena tatsi irũ paxa tatsi yabara jume cowũnta xua Nacom yawenapaeba. Daxota Moisés matsiyatatsi botha acoibi po xometobe poxonaē aena naexana. Moisés pena yabara nanta xeinatsi yawa paxa yabara nanta xeinatsi xua Moisés itũbũn tsecae. Baponbe jopa yabara jume cuitaya junuwiyobe xua po coyene cui itoroba Faraón pon Egipto nacuapiwi itorobiya pia pepa pee-watsinchi xua pinae daxita pexui pebin wũtixi bewa jutebinchi.

²⁴ Irũrũ Moisés yabara jume cowũnta xua Nacom yawenapaeba. Daxota poxonaē bayatha pinyoba Moisés jume aichaxaibiya naitemata, jeye: “Xan barapowa jopa pexanton tatsin powa Faraón pexantiyo tatsi”, jei Moisés.

²⁵ Saya jame bapon Moisés itapetatsi xua irũ yawa muxuna atene exanaeinchi Nacom piamonae tatsi xua poxonaē barapomonae atene exanaeinchi xua ichamonae atene exanaena pomonae Egipto nacuamonaexae. Moisés ichichipa xua pecana exanaewa tsainchi icha piamonae tatsi tacana ichichi. Moisés jopa benaexanaeyo xua daxitan pexeinaewa tsane pecoutha pocotsiwan xua Faraón xeina. Icha baxuan xeinaetsipa Moisés jũntũ coyene weiweina exanaetsipatsi barapo nacuatha xua saya caepatiyo nexa tsipae po coyene xua jiwi weiweina exanatsi xua

abe peexanaponaewa. Moisés piamonae jopa benaitem-atsiyo daxota jopa benotsiyo Faraón pecopiniwa tatsi. ²⁶ Ichamonae Moisés ts̄m̄m̄ jumetha biatainchi xua aj̄n̄-t̄coyenetane exanatsi icha Mesías ichichi pon Nacom itoroba. Poxonae Moisés nayabara jume tane baxua tsita coyene xanepanatsi, beyacaincha xua poxonae barapo copei pexeinaewa tsane Egipto nacuatha. Baxua Moisés itapeta tsipei ichichipa xua pexeinaewa po pentoma bexa tsane Nacom catsina bapontha peatenexae po pentoma bayatha Nacom yabara tsiw̄nae muxu duta.

²⁷ Moisés yabara jume cow̄nta xua Nacom Moisés yawenapaebatsi. Daxota naj̄nt̄ coyene weta xua pe-warapaewa tsane Egipto nacua weya. Moisés jopa junuwiyo bequein yaputane xua Faraón bara casebina. Bapon Moisés bara saya amsiya pona bara be xani-waicha tane Nacom xua be yatsicaewa bar̄ poinchi pon peinya peponaein xua jiwi jopa itac̄paetsi xua petaewa. ²⁸ Moisés pejume cow̄ntsixae Nacom, piamonae cui itoroba xua peexanaenexa penabanaewa xua Pascua w̄n̄ matakabi nexa. Matautano bapon cui itoroba piamonae xua pejanantha pecapibinexa daxita bom̄x̄u pecoibotontha. Barapo Moisés piamonae tatsi pomonae Israel pia pemomoxi susato jiwixae tatsi baxuan exana xua daxota matatsunpin jopa t̄pa exanaeyo piamonae. Barapo matatsunpin merawi patopaena xua pejutebiwa tsane matapin jiwi pomonae pia bontha jopa xeinaeinyo po jana xua Moisés cui itoroba xua jiwi bom̄x̄u pecoibotontha pecapibiwa tsane.

²⁹ Barapo Israel pia pemomoxi susato jiwi tatsi yabara jume cow̄nta xua Nacom yawenapaeba. Daxota Mar Rojo mene mentha icha muxunene beya panenebiya xua epatauta iya pona be poxonae xua ira tsewa iya peponaewa. Ichitha poxonae Egipto nacuamonae baraxoya

iyiya daxita bunothopa.

³⁰ Israel pia pemomoxi susatopiwi tatsi yabara jume cowunta xua Nacom yawenapaeba. Daxota matawacaicha tocuecueniya enaponeiba pemuxuburu iya siete po matabibe xua barapo Jericó tomara peyacaincha toxorotsi dutsiwa xua be iboton. Barapoxonae barapo Jericó tomara peyatoxorotsiya yacaincha dutsiwa baxua iratha jopiya. ³¹ Bayatha yabuyo powa Jericó tomarapiwayo Rahab yabara jume cowunta Nacom pon Israel pia pemomoxi susato jiwi tatsi pia Nacom tatsi. Daxota bapowa jopa baru tupaeyo piamonae xua pia tomarapiwixae poxonae tomarapiwi werapa jopa pejume cowuntsixae Nacom pon Israel pia pemomoxi susato jiwi tatsi pia Nacom tatsi. Bapowa Rahab powa copiya bayatha pesi cui weiweinaewa pebiwitha. Poxonae Israel pia pemomoxi jiwamonae namicha pata xua pecui amanayabiya taenexa Jericó tomaratha, bapoxonae barapowa Rahab matenta weyataeya waba, xua barapo israelmonae jiwamonae wabatsi pia botha tatsi.

³² Jopa equeicha paebinyo xua equeicha pinmonae tayabara paebiwa pomonae pejume cowuntsiwi Nacom. Jopa neyapu jupaeyo xua jopa taxeinaewa matabibi xua tacueicueijeinexa Gedeón yabara, iruno Barac yabara, iruno Sansón yabara, iruno Jefté yabara, iruno David yabara, iruno xua Samuel yabara, iruno pomonae Nacom pia peitorobi jume petapaebiwi tatsi yabara. ³³ Daxita barapomonae jume cowunta Nacom. Ichamonae barapomonae jiwana, amanayaba ainya nacuanpiwitha, pejume cowuntsixae xua Nacom yawenaena. Ichamonae pejume cowuntsixae Nacom daxota jiwitha beta xaniwaicha canamata itoroba. Ichamonae pejume cowuntsixae Nacom barapomonae catsibatsi pocotsiwan xua bayatha Nacom yabara tsiwuna muxu duta. Ichamonae pe-

jume cowuntsixae Nacom, Nacom exana xua coibo acaba neuthun, xua barapomonaе jopa atene peexanaenexatsi barapo neuthun. ³⁴ Matautano ichamonaе pejume cowuntsixae, daxota Nacom yawena barapomonaе poxonaе Nacom itaxutaba exana po isoto bichocono pin isoto xua barapomonaе po isototha tautatsi. Barichi ichamonaе pejume cowuntsixae daxota Nacom capanenebiya tsaibi barapomonaе poxonaе muxu pejutebeibichi peopi sojeiwantha xua be cusi. Matautano pomonaе faefaena, equeicha Nacom daunwei exana. Daxota barapomonaе daunwei poxonaе naba. Ichamonaе Nacom peyawenaexae amanayaba pia peaitafaetabi jiwichi xua ainya soldadomonaein bicheitontha. ³⁵ Barichi ichamonaе yabuxi pejume cowuntsixae equeicha caewa piamonaе xeina, pomonaе equeicha caewa taasutsi petupaewa weya.

Ichamonaе itacupatsi xua panenebiya xua jopa werapae tsane xua icha poxonaе Nacom itawetatsina. Nama barapomonaе jopa bepaebiyo baxua daxota barapomonaе werapa poxonaе bichocono caitacueintatsi ichamonaе. Barapomonaе, pomonaе pewerapaewi yaputane xua pejume cowuntsixae Nacom, daxota Nacom equeicha asu exanaena xua barapomonaе pepatsiwa tsane Nacom pia nacuatheicha. ³⁶ Ichamonaе pejume cowuntsixae Nacom, bichocono ajuntucucioyenetane tsipei bichocono cui capanebatsi ichamonaе. Matautano ichamonaeru cuantebatsi. Ichamonaeru penain mutontha cubebatsi. Ichamonaeru jiwi pecubi bontha cuaranobatsi. ³⁷ Ichamonaе pejume cowuntsixae Nacom, ibotontha tupa exanatsi poxonaе cuinbabatsi. Matautano ichamonaе werapa poxonaе epa nantarabobiya thabebatsi seruchotha. Iruu ichamonaе pejume cowuntsixae jutebatsi peopi sojeiwantha xua cusin. Ichamonaeru pejume cowuntsixae Nacom, taseicatsi pexaewa, yawa taseicatsi bon, xua daxota

saya dubenanaebiya, yawa naxataba oveja bocoton xuanano xua cabra bocoton. Barapomonae acopeibiwi tsobena, barainebatsino abe taexanebatsino. ³⁸ Pomonae barapo cae pin nacuathepiwi Nacom pejume cowuntsiwi yabara paebatsi, yabara jeichiche: “Jopa be cui copatichi xua barapomonae pejinompaewa tsane watomaratha”, yabara jeichichi. Ichitha barapomonae Nacom tsita ainya cuichi beyacaincha barapomonae pomonae barapo cae pin nacuathepiwixae. Barapo Nacom pejume cowuntsiwi dubenanaebiya ichaxota ira xuepana susato tsurucuae nacuatha. Matautano barapomonae demxuwantha dubenanaebiya, muthunthano jinompa, xuano xua duwei pia muthuntha jinompano.

³⁹ Bequein Nacom yabara paeba barapomonae xua beta peexanaexae pejume cowuntsixaetsi, daichitha cataunxuae abũ barapomonae jopa catsibichi pocotsiwa Nacom bayatha yabara tsiwuna muxu duta barapomonae, matautano xua caeinthano. ⁴⁰ Barapomonae cataunxuae abũ jopa catsibichi baxua tsipei Nacom naca yabara nanta xeina xua bexa tsane irũ naca catsibina pocotsiwa bapon tsita xanepanatsi. Pocotsiwa bapon catsibina xua apara barapomonae Nacom naca cayawa muxuna jũntũ coyene xanepana exanaena.

12

Meje yabara xua waxainchi bewa exanaponaetsi icha Jesús ichi poxona exanapona

¹ Pomonae xuaunxuae yabara pacata tinatsi barapomonae bichocono pin bicheitomonae, pomonae pejume cowuntsiwi po coyene xua Nacom yawenapaeba. Barapomonae naca tsita itapeinya xeina xua awiya xanepanaya jume cowanta dubenanaebiya bequein atene exanatsi ichamonae. Baxua naca cuiduba xua irũ bewa

xanepanaya jume cowanta dubenanaebiyaeinchi bequein naca atene exana ichamonae. Barabũ waxainchi daxita nacui barapentinchi abe waexanae cuiru coyenein pocotsi coyenein xua jopa naca yawenaeyo xua Nacom beta wataexanaewatsi. Barabũ waxainchi beitatemaya ajuntũsya awiya exanapoinchi pocotsiwa Nacom naca cui itoroba. ² Saya meisa Jesús jũntanainaeya jinompatsi wanaca yawenaenexa. Bapon copiya bichocono pejume cowuntsixae Nacom daxota bapon wanaca canamataxeinaein xua wajume cowuntsinexa. Mataũtano bapon betiya naca exana xua beta wajume cowuntsiwa poxonae cataunxuae awiya wajinompaewa barapo cae pin nacuathe. Jesús bara saya copata xua atene exanadutatsi naetotha ichamonae poxonae tũpa exanatsi. Bapon jopa auriyo bequein naetotha tũpa exanatsi jiwi peitutha tatsi. Ichamonae ba bichocono aura xua poxonae petũpae exanaewatsi naetotha. Nama bapon Jesús jopa auriyo poxoru nayabara yaputane xua pirapae poxonae nacana cui wetinchi xua atene exanatsi, xuano xua poxonae tũpa exanatsi naetotha, bapoxonae bichocono jũntũ coyene weiweinaena. Anoxuae bapon Jesús eca pia pexeinya peecaethopeibiwatha xua Nacom pia pecoxa weya tatsi xua itabocothaicha ichaxota Nacom eca pia pexeinya peecaethopeibiwatha.

³ Jesús pacayabara jũntanainaponde xua bayatha po coyene Jesús abeya exanatsi pomonae abe peexanae jiwi. Jesús awiya beitatemaya saya popona poxonae bequein bichocono atene exanatsi barapomonae pomonae abe peexanaewi. Daxota jopa paraichinde xua poxonae jopa pana najũntũ coyene tsacabim. Mataũtano jopa paa-jũntũcoyenefaetabinde xua poxonae daxota jopa beta painya taexanaewa Nacom. ⁴ Painya jũntũ coyenewatha pajume torobabame abe peexanae cuiru coyenein xua

painya neexanaeyainwa barapo coyenein. Bapoxonae jopa panaitematsim xua painya nejume cowuntsiwa Nacom. Bequein bara baxua daunwei paexaname ichitha awiya cataunxuae jopa pawerapaem xua barapo coyene painya neexanaexae icha bayatha Cristo ichi xua tupa xua bichocono daunweya peexanaexae barapo coyene.

⁵ Paxam pajuntemainame xua bayatha Nacom paca muxuweta xua paxam bara Nacom pia pexui tatsi pam. Baxua yabara Nacom Pejume Diwesitha paca jeye:

“Tapexui pam, jopa amsiya payabara nanta xeinaeinde pocotsiwa yabara paca muxuwetatsi tapaca cuidubinexatsi.

Poxonae atene paca exanatsi jopa ajuntucoyenefaetabiya pajinompaeinde xua yabara tapana nejume cowuntsiwam.

⁶ Tsipei muxuwetsiya cuiduban pomonaetha pomonae antobein.

Matautano atene exananno pomonaetha pomonae tapexui tsicotan”, jei Nacom Pejume Diwesitha.

⁷ Awiya juntema pajinompare poxonae bequein Nacom paca atene exana xua paca necacuidubixae. Baxua Nacom pacata exana tsipei paca nacana exana pia pexui tatsi pam. Dapo pexuyo ajibi, po pexuyo jopa paxa muxuwetsiya cuidubichi xua poxonae icha bichocono antobetsi paxa.

⁸ Nacom pia pexui muxuwetsiya cuiduba. Icha Nacom jopa paca muxuwetsiya cuidubichipae, bapoxonae paxam jopa Nacom pia pexui tatsi pam tsipae. Saya be catsa pexui pam tsipae icha be pocotsi pexui ichi po pexui seicaya icha paxa barompa. ⁹ Matautano caena bayatha poxonae cataunxuae pexuichi waxeiwi naca atene exana wanaca muxuwetsiya cuidubixae. Daichitha waxeiwi baru cui itura jinatsi. Waxainchi bewa ichichipaetsi xua waexanaewatsi pocotsiwa naca cui itoroba pon Waxa

Nacom, pon itabocotheicha popona. Barapocotsiwa bewa exanaeinchi beyacaincha pocotsiwa exanatsi xua poxonae waxeiwi naca cui itoroba poxonae jinompatsi barapo cae pin nacuathe. Baxua bewa exanaeinchi Waxa Nacom pon itabocotheicha popona wanaca catsinexa peajuntuyapusu coyenewa. ¹⁰ Waxeiwi poxonae pexuichi barapo cae pin nacuathe saya caepatiyo naca muxuwetsiya cuiduba. Baxua nacata exana icha be pocotsi coyeneya xua ichichipa xua tsita xanepanatsi. Ichitha nama Nacom naca muxuwetsiya cuiduba wanaca yawenaewa tsane. Matautano baxua nacata exana xua wanaca cana exanaewa tsane xua bichocono wajuntu coyene xanepanaewichi, icha Nacom ichi xua bichocono pejuntu coyene xanepanaein. ¹¹ Poxonae naca atene exana bara bapoxonae nanta xeinatsi xua jopa nacata xaexaenaecaeyo, tsipei bara xaniwaicha naca atene exana. Ichamonae yabara cui copaba xua bara nacuiduba xua poxonae bequein Nacom atene exana, pemuxuwetsiya cuidubixae. Barapomonaе jame jopa natsicuentisi tsane xua abe peexanaexae bapontha. Barapomonaе xeinaena pejuntu coyene xanepanaewa Nacomtha xuano junteма dubenanaebiyaena.

Meje yabara xua poxonae Nacom naca muxuweta xua jopa bewa Nacom itawetichi

¹² Yaitama pajuntu coyene faefaename, xua painya nejume cowuntsiwa daxota painya coutha pana najuntu coyene tsacabare xua beta painya nejume cowuntsiwa tsane Nacom. Matautano xua payabara ajuntucoyenerewem tsaibi ichawan. Pana najuntu coyene itorobare xua awiya ayapusya painya neexanaponaewa tsane. ¹³ Painya xoba icha diwesi pajume cowuntame po diwesi xua jopa Nacom Pejume Diwesi tatsi. U meisa paexanare pocotsiwa Nacom Pejume Diwesitha yabara

paeba xua beta painya nejume cowuntsiwa. Icha baxua paexanaetsipame iru ichamonaē barichipae. Bequein barapomonaē copiya juntu coyene faefaenaetsipa pejume cowuntsiwatha ichitha bapoxonaē beta exanaponaetsipa xua pejume cowuntsiwa pia paca cui taexae.

¹⁴ Nantiya daxita jiwi ajuntuypususya betiya pana nabaru junte miya jinompare. Bichocono pana najuntu coyene xanepana exande Nacomtha xua jopa painya nenatsicuentinexa xua abe painya neexanaexae bapontha, xua painya netaenexa bapon. Tsipei pomonaē jopa xeinaeyo barapo coyene jopa itacupaetsi xua Nacom petawatsi tsainchi. ¹⁵ Dota pam xua ichamonaē pomonaē paxam jiwana pam pia xoba jopa ichipae yo po coyenewa Nacom yawena barapomonaetha pia peantobewaxae. Matautano barapo ichamonaē pomonaē painyamonae jiwanaxae pia xoba abe exana ichamonaē peitutha tatsi xua daxota iru ichamonaē pebarichinexa xua abe peexanaewa. ¹⁶ Ichamonaē pomonaē paxam jiwana pam, pia xoba nota icha yabuxitha, powaxi jopa xapain barompaya pia seurixi. Matautano dota pam xua ichamonaē paxam jiwana pam jopa tsita pecui paw tsainchi po coyenewan xua Nacom piawan tatsi. Barapo coyene Esaú exana pon caena bayatha tupa. Bapon Esaú jopa tsita ainya jume cuiyotsi pocotsiwa bayatha Nacom yabara tsiwunaē muxu duta xua bepa pinae Nacom Esaú yaweneibichi. Barapon Esaú piyainxae peyapintha Jacobtha cata po coyene xua pia coya pecanamataxeinae coyenewa po coyene matapin ba xeina. Tsipei Esaú jopa jume cowuntsiyo Nacom daxota nata caenaeta barapo coyenewa xua nata matomata pexaewa xua saya cae penabanaewiyo. ¹⁷ Paxam payaputaneme xua bapon Esaú pirapaeyo ichichipa xua equeicha caewa pexeinaewa tsane xua po coyene peainya cui coyene po coyene mat-

apin ba xeinaena xua paxa catatsi. Barapo coyene po coyene xua coxiywn tawuca pexanto pon matapin xua Nacom peyawenaewa tsane. Ichitha bapon Esau peyapin cata barapo coyene xua matomata ppara. Bequein bara bapon auranaya caunutsiya wecoyeya paeba, ichitha jopa itacupaetsi xua caewa xeinaena barapo coyene po coyene xua ba matapin xeina.

¹⁸ Caena bayatha pia Nacom caquita ponaetsi Israel pia pemomoxi susato jiji tatsi demxuwa itabaratha umena poxona Nacom Moisés catatsi pia peitorobi coyenewa. Barapomona jume tane pocotsiwa Nacom paeba yawa tane demxuwa. Ichitha nama paxam jopa beparaichim. Jopa panantawenonaem xua paumenaename demxuwa itabaratha xua painya necaquita ponaenexa Nacom. Poxona Israel pia pemomoxi susato jiji tatsi umena barapo demxuwa itabaratha, baxoyo pin isoto uncueica barapo demxuwatha. Matautano bapoxona bichocono quirei, yawano nobonno. Matautano pin joibo baxoyo uncueica. Ichitha jopa bara paichim, jopa pataem baxuan. ¹⁹ Paxam jopa pajume taem peobiwa jume po peobiwa pewwn trompeta nain matawun, icha poxona barapo Israel pia pemomoxi susato jiji tatsi ichi xua jume tane barapo trompeta jume. Paxam jopa pajume taem Nacom pejume poxona Nacom cueicueijei barapo Israel pia pemomoxi susato jiwitha tatsi barapo demxuwatha. Pomona jume tane barapo jume, barapo israelmonaexae Moisés jume itorobatsi xua bepa pinae Nacom equeicha jopa pepaebiwa tsane. ²⁰ Barapomona baxua Nacom jume matawentatsi tsipei bichocono pijunuwi xua pocotsiwa Nacom itorobina. Poxona itoroba Nacom jeye: “Pon nataxuna jayata barapo demxuwa bewa bapon pabexubim ibotontha. Jopa ainya cuiyo bequein icha metha duwein tsipae, xuano icha metha bequein jiton tsipae”,

jei Nacom. ²¹ Barapomonaē bichocono junuwa pocot-siwa xua tane barapo demxuwatha iru Moisés bichocono junuwa. Daxota paeba, jeye: “Bichocono tajunuwi jijiyan”, jei Moisés.

²² Jame anoxuae painya nejume cowuntsixae Nacom, bapon paca yabara cui copata xua painya nepatsiwa tsane bapon pia tomaratha tatsi, po tomara pewun Jerusalén tomara. Barapo tomara eca ichaxota po demx-uwa pewun Sión. Barapo tomara Nacom pia tomara tatsi pon ataya tsitecaeya asuya pepoponaēin. Barapo tomara xua pepa Jerusalén tomara Nacom pia nacuathe-icha tatsi eca. Matautano papatsiname baxoteicha ichaxota jinompa ayeimonaē matatsunpiwi, xua weiweinaeya nanacaetutsina xua pia nanabaru wunaē jainchinexa Nacom. ²³ Matautano pajume cowuntame Jesús xua painya nepatsinexa ichaxota Nacom piamonaē tatsi nacaetuta pomonaē Nacom pia diborotha wun dubena xua itabocotheicha. Barichi papatsiname Nacomtha, pon yabara paebina daxita jiwi xua penatsicuentisiwa xua abe pe-exanaexae. Matautano papatsiname ichaxota jiwi pia jumopein tunaxu tatsi jinompa pomonaē xua beta exana xuano xua Nacom beta cana juntu coyene wetsiya xanepanaya exana. ²⁴ Matauta papatsiname ichaxota Jesús popona pon jiwi peyabara jume yawenaēin Nacomtha xua jiwi pepatsiwa tsane Nacomtheicha. Matautano bapon nacata catsica Nacom pia pena peyabara tsiwunaē muxu dutsiwa tatsi. Bapon pia pejana tatsi xua barapo jana pepichapabarenaexae Nacom naca yabara juntu coyene junteinaē abe waexanaē cuiru coyenein. Barapon pia pejana tatsi jiwi beta cana exanatsi bey-acaincha Abel pia pejana tatsi. Tsipei poxonaē bapon bexotsi, jopa nantawenonaeyo xua bapon peyantomatsi-watsi. Ichitha poxonaē Abel bexotsi, nantawenona xua

peyantomatsiwatsi.

²⁵ Dota pam. Jopa bewa pajume itawetsim Cristo pon wanaca tsipaebixae Nacom yabara. Pomonae bayatha Nacom jume itawetatsi poxonae bequein Moisés muxuweta jwi barapo irathe Nacom nexa, barapomonae jopa Nacom capanenebiyaeyo xua atene abe pia peexanaexae. Waxainchi jopa naca itacupaeyo xua panenebiyatsi xua atenetsi abe waexanae coyenewantha icha jopa Nacom jume naitawetatchi xua itaboco wetsica wanaca tsipaebiwa. Waxainchi bichocono nama atenetsi, beyacaincha barapomonae xua atene abe pia peexanae coyenewantha pomonae Moisés barꞥ popona. ²⁶ Caena bayatha Nacom tsipaeba barapo irathepiwi tsique poxonae Moisés popona, Nacom pia jumetha ira jijiyata exana. Ichitha anoxuae Nacom tsiwanaya jeye: “Abꞥ equeicha bara caeto tsane ira jijitsin yawano itabocothoichano jijitsin”, jei Nacom. ²⁷ Poxonae Nacom jei: “Abꞥ equeicha bara caeto tsane”, jei, naca yaputane exana xua Nacom aichurucuae exanaena pocotsiwan xua barapo cae pin nacuathe xeina pocotsiwan itacupaetsi xua pejijiyatsiwatsi. Saya meisa jopa aichurucuae exanae tsainchi pocotsiwan xua jopa itacupaetsi xua pejijiyatsiwatsi xua pocotsiwan Nacom piamonaetha peyabara tsiwꞥnae muxu dutsi coyenewa. ²⁸ Nacom pia nacua, ichaxota Nacom itoroba, yawano xua waxainchi baxota itorobatsi, barapo nacua jopa itacupaetsi xua jijiyatatsi xua aichurucuae peexanaenexatsi. Daxota bewa jeichichi Nacomtha: “Nacom, maisa pajuntu coyene weiweinan pebaxuaxae”, bewa jeichichi. Poxonae Nacom wꞥnae jaintinchi waxainchi bewa yabara nanta xeinaetsi pia pejuntu coyene xanepanae coyenewa tatsi. Matautano bewa bapon cunuwiya wꞥnae jaintinchi pia peyapusꞥwa pexeinaexae. ²⁹ Wanacom weraweraca cana exana jwi, pomonaetha pomonae jopa pejume cowꞥntsi-

wichi. Nacom baxua exanaena icha be poxonae nawa ichi xua poxonae daxita topowa poxonae taxua.

13

Meje yabara xua pocotsiwa bewa exanaetsi xua pocotsiwa Nacom tsita xanepanatsi

¹Jopa pana nacui barapentsinde xua caemonae nantiya painya nenaantobewam pomonae be painya eweicho jiwi painya nenatsicotae jiwi pam painya nejume cowuntsixae Jesucristo. ²Jopa pajuntemainaeinde xua beta painya netaexaneibiwa tsane pomonae pateiba painya bontha pomonae iru pejume cowuntsiwi Nacom tsipei metha beya jemeicha barapomonae tsipae pomonae Nacom itoroba xua beta painya nepacata exanaenexa. Caena bayatha ichamonae pexaewa apata poxonae matha jemeicha pia botha tapatatsi, xua poxonae jopa xapain yaputaeyo xua deta cou apara matatsunpiwi.

³Payabara nantu coyene xeinare pomonae jiwi pecubi botha cuaranobebatsi painya neyawenaenexa barapomonae icha be poxonae paichim xua iru jiwi pecubi botha paca cuaranobaru. Payabara nantu coyene xeinare pomonae peraxa jubebatsi xua ichamonae exana painya neyawenaenexa barapomonae. Tsipei paxam iru jiwi pam, paca yabara itacupatsi xua ichamonae paca necaperaxa jubwi.

⁴Paxam bewa beta pananta xeinaem poxonae jitha paename xua barapo coyene paca tsita ainya cui. Daxota jopa bewa ichawa beya panasi cui weiweina exanaem poxoru painya seurixi bayatha paxeiname. Tsipei Nacom yabara paebina jiwi xua penatsicuentsiwa xua abe peexanaexae pomonaetha pomonae jopa xapain exanaeyo xua be poxonae yabuxi jeita xua po coyene jiwi jopa yabara copatsiyo. Matautano barichi Nacom yabara paebina jiwi

xua penatsicuentisiwa xua abe peexanaexae pomonaetha pomonae nasi cui weiweina exana poxonae bequein pia seurixi xeina.

⁵Jopa bichocono paichichipaeinde paratixi. Jame maisa pajuntu coyene weiweinare painya nexainaexae pocot-siwa Nacom paca catsiba. Baxua paexande tsipei Nacom jeye: “Bapana jopa compa capopona exanae tsainchi. Bapana jopa cacuenta ponae tsainchi”, jei Nacom. ⁶Daxota naca itacupa xua jume cowantsiya jeichichi:

“Nacom, pon jiwi Pecanamataxeinaein,

bapon pon xua tana neyawenaein.

Jopa junuwinyo poxonae jiton xua

abe tana exanaewa”, jeichichi.

⁷Payabara cui juntanainare painya nepaca canamataxeinaewi pomonae bayatha paca cuiduba Nacom Pejume Diwesi. Barapomonae pacui taema, tsipei barapomonae beta jume cowantsiya jinompa beya poxonae barapomonae yacuiya werapa. Paxam beta pajume cowantsiya jinompare icha barapomonae ichi xua beta jume cowantsiya jinompa.

⁸Jesucristo saya tsitecaeya pepu jupa exanaponae. Baxua exana caena bayatha, anoxuaeno, xuano xua bara ataya tsitecaenano xua jiwi beta peyawenaewatsi.

⁹Daxota jopa pacopatsinde xua ichamonae painya nepaca cuidubiwa icha pecuidubi diwesi po diwesi pia diwesi barompa, po diwesi jopa Cristo pia diwesi tatsi. Jame ainya cui xua naajuntuyapusu exainchi Nacom pia peantobe coyenewatha. Po coyenein xua itoroba xua penabanaewa yabara barapo coyenein jopa naca ajuntuyapusu exanaeyo Nacomtha. Barapo peitorobi coyenewan bapana jopa yawenaetsi pomonae bequein xua exanapona barapo coyenewan.

¹⁰Waxainchi xeinatsi barompaya wacoyene po coyene be poxonae xua tuxusi exanatsi Nacom nexa poxonae

caein naetotha naca tsitupa xua daxota Nacom jopa tsitatsi xua penatsicuentiwa xeinatsi xua abe waexanaexae. Baxua apara xua poxonae Cristo tupa naetotha abe waexanae cuiru coyenein nexa. Po sacerdotepiwi xua nacuita Nacom pia tututha anserabocototha xua caena bayatha barapocotsi coyene jopa itacupaetsi xua pexeinaewa barapo coyene tsipei barapo sacerdotemonae cataunxuae jutebeiba duwei jiwi abe pia peexanae cuiru coyenein tatsi nexa. ¹¹ Caena bayatha pon pepa sacerdotepin, duwein jana capaneiba ichaxota po tutu yatsicaewa Nacom pia tutu tatsi po tutu bichocono peainya cui tutu. Bapon baxua exana xua Nacom peyabara junteinaenexa jiwi abe pia peexanae coyenewan tatsi. Bapoxonae barapo duwein ompin tautatsi tomara cuariya beya. ¹² Cristo barichichi. Tomara cuariya beya tupa exanadutatsi naetotha, xua daxita jiwi pejuntu coyene xanepana exanaenexa tsainchi Nacom. Cristo pejana pichapabarenaexae poxonae tupa, Nacom jopa tsitatsi xua jiwi penatsicuentiwa xua abe peexanaexae. ¹³ Ichamonae Jesús aura exanatsi poxonae tomara cuariyatha tupa exanadutatsi naetotha. Barabu copatatsi xua ichamonae iru naca aura exana wajume cowuntsixae Jesús xua daxota naca atene exana icha Jesús ichichi. ¹⁴ Barapo cae pin nacuathe jopa xainaetsi tomara, po tomara ataya tsitecaeya ayapusu tsuncuae. Jame wunaeya ewatatsi, po tomara xua bexa patopaetsica Nacom pia nacia wetsica tatsi. ¹⁵ Daxota waxainchi bewa wuna jainteibichi Nacom tsipei Jesucristo naca tsitupa. Poxonae Nacom wuna jaintatsi wajumetha baxua icha be poxonae ichi poxonae duwein tautatsi poxonae tuxusi exanatsi Nacom nexa. Nacom wuna jaintatsi jeichichi: “Nacom maisa bichocono nejuntu coyene xanepanaein”, jeichichi. ¹⁶ Jopa pajunteinaeinde po coyene xua

beta painya taexanaewa ichamonaē. Painyawan panata jiwana wetsabare pocotsiwan xua paxei name xua painya necatsibinexa pomonaē xua jopa xeinaeyo. Tsipei poxonaē baxua paexaname, bichocono xanepana icha be ichi poxonaē paexaname poxonaē duwein patautame xua patuxusi exaname Nacom nexa pocotsiwa Nacom tsita xanepanatsi.

¹⁷ Paexande pocotsiwa paca cui itoroba pomonaē painya nepacacanamataxeinaewi. Matautano saya barapomonaētha pajume naitaeware. Pabarū cui itura jinare barapomonaē tsipei barapomonaē paca jūntū coyene eeniya ewata. Barapomonaē yaputane xua bexa tsane Nacom barapomonaē yabara paebina xua penatsicuentsiwa xua abe peexanaexae icha barapomonaē jopa beta paca jūntū coyene eeniya ewatsiyo. Bara pacopare xua barapomonaē jūntū coyene weiweina exanatsi poxonaē paca jūntū coyene eeniya ewata xua jopa pejūntū coyene wecoyeinexa xua abe painya neexanaexae. Tsipei icha barapomonaē jūntū coyene wecoyei baxua xapain jopa paca yawenaeyo.

¹⁸ Nacomtha painta wūcare. Bara payaputan xua pata jūntū coyene pana netsipaeba xua pinae bara beta paexanan. Paxan paichichipan xua awiya beta pata exanaewa daxita coyenewan. ¹⁹ Paca wūcatsi xua painya inta wūcaenexam tsane Nacomtha xua Nacom bara inta pecopatsinexa xua methaunxuae tapaca siwa ponaewa tsainchi equeicha.

Meje yabara xua najume wetsiya paeba pon tina

²⁰ Nacom, barapon peyajūntū coyene jinaein xua jūntū tema pepoponaewa. Barapon Nacom Jesús caewa asū exanatsi petūpaewa weya pon Wanacanamataxeinaein. Bapon Jesucristo pon pepa Peewatsin xua daxita carepaya jiwi peewatsinchi icha be pocotsin oveja beta peewatsin ichi. Bapon Jesucristo pejana pichapabarenaexae

poxonae tupa, canacui wetsiya exana po coyene xua bayatha Nacom yabara tsiwuna muxu duta po coyene xua ataya tsitecaeya tsane. ²¹ Barabu barapon Nacom paca juntu coyene xanepana exanaena xua jopa painya nenatsicuentinexa xua abe painya neexanaexae. Matautano bu bara paca catsina xua daxita pocotsiwan panantawenoname xua xuan xanepanaya painya exanaenexa po coyenein Nacom ichichipa. Barichi barabu Jesucristo pia peayapusuwa naca cana exanaena xua exanaeinchi po coyene Nacom tsita xanepanatsi. ¡Barabu jiwi Cristo ataya wuna jaintinchi pexeinaexae peayapusu coyenewan! Je, bara ichi tsane.

²² Tamonae pam, pomonae pam iru painya nejume cowuntsixae paca itorobatsi xua bepijawa jopa payabara jume cui aitaconaeinde po jumein paca muxuwetatsi, barapo tsica cartiyo po cartiyo imoxoyo jume tsecae.

²³ Maisa ichichipan xua painya neyaputaewa tsane xua Timoteo bayatha copatatsi jiwi pecubi bo weya. Barapon be wayapin watsicotaein pejume cowuntsixaeru Jesucristo. Ichaunxuae bapon taxantha patopaena bapon methaunxuae nebaru iya tsane painya xainya beya xua equeicha tapaca siwa ponaewa tsainchi.

²⁴ Painta jacobare daxita pomonae painya nepaca canamataxeinaewi. Iruno painta daxita jacobare pomonae pejume cowuntsiwiru Jesucristo. Italia nacuamonae piwi barapomonae paca jacobae, pomonae iru pejume cowuntsiwi.

²⁵ Barabu Nacom daxita pam bichocono paca yawenaena pia painya nepaca caantobewaxae.

Nacom Pejume Diwesi po diwesi pena jume diwesi xua
Jesucristo yabara tinatsi
New Testament in Cuiba

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22
